

四庫全書

史部

欽定四庫全書

史部
四川通志卷四十六

詳校官監察御史_臣李陽樸

檢討_臣德生覆勘

總校官編修_臣王燕緒

校對官編修_臣潘庭筠

謄錄監生_臣周元梓

欽定四庫全書

四川通志卷四十六

藝文

詩話

司馬相如為上林子虛賦意思蕭散不復於外事
相關控引天地錯綜古今忽然如睡煥然而興幾
百日而後成其友人盛覽字長通牂牁名士嘗問
以作賦相如曰合綦組以成文列錦繡而為質一
經一緯一宮一商此賦之迹也賦家之心包括宇
宙總覽人物斯乃得之於內不可得而傳覽乃作
合組歌列錦賦而退終身不敢復言作賦之心矣
相如將獻賦未知所為夢一黃衣翁謂之曰可為

大人賦遂作大人賦言神
仙之事以獻之賜錦四匹

司馬長卿賦時人皆稱典而麗雖詩人之作不能
加也揚子雲曰長卿賦不似從人間來其神化所
至耶子雲學相如為
賦而弗逮故雅服焉

揚雄讀書有人語之曰無為自苦玄故難傳忽然
不見雄著太玄經夢吐鳳凰集於玄之上頃而滅
或問揚雄為賦揚雄曰讀千首賦乃能為之揚子
雲好事常懷鉛提槧從諸計吏訪殊方絕域四方
之語以為裨補輜
軒所載亦洪意也

揚子雲曰軍旅之際戎馬之間飛書馳檄用枚臯
廟廊之下朝廷之中高文典冊用相如又枚臯丈
章敏疾長卿制作淹遲皆盡一時之譽而長卿
首尾溫麗枚臯時有累句故知疾行無善迹矣

惟寂惟莫自投於闇爰清爰靜無作符命此譏子雲作也宋孫明復曰太玄一書乃明天人始終之理君臣上下之分蓋疾莽而作也王介甫諸家以年數考之謂子雲與莽不相及上符命投闇恐係谷子雲事鑿鑿有據是何人忍於污譏賢者如此近日李本寧移書示予謂其在戶西以此段書之墨池上乃與當時意見不合後竟入彈章噫不但賢者被誣即代辨誣之人亦被禍矣可一慨嘆桓譚新語雜作甘泉賦夢腸出收而納之卒

王逸少與周益州書司馬相如揚子雲有後否西京雜記載卓文君為相如作誄梁劉孝威詩君平子雲闡不嗣江漢英靈信已衰宋有述禪子揚補之則自稱子雲後云

晉惠帝時蜀中謠江橋頭關下市成都北門十八子十八子李也其後李椎據蜀僭號按漢武元鼎

二年立大城九門少城
九門故有十八之稱

豆子山打瓦鼓陽平山撒白雨此綿州巴歌也巴
歌二字纔見此後劉禹錫之竹枝詞李紳之巴女
詞皆其變體若常璩巴志所引川崖惟平維
月孟春等篇則古詩者流非通俗之唱矣

杜宇化子鵲蜀本紀華陽國志俱引之其作詩實
起於鮑昭行路難云中有一鳥名杜鵑言是古時
蜀帝魂

有兩揚雄兩李膺兩王褒漢揚雄成都人乃作太
玄經者字從手漢王褒資中人作賢臣頌者晉李
膺涪城人作益州記者已上皆土著也漢李膺為
益州太守寰宇記云城西三里有李膺宅後周王
褒同庾信從益州趙王出鎮之蜀褒詩有奉和趙
王途中五韻峽路沙如月山峰石似眉錦城邈可

望迴鞍念此時之句隋楊雄持節入蜀迎
梁主蕭巋者字從木以上皆宦游者也

鄺道元水經注曰峩山縣東北有武陽龍尾山并
仙者羽化之所於其處得遺咏雖神栖白雲屬想
芳流藉念泉鄉遺詠在茲覽其餘誦依然息遠匪
直邈想遐跡愛其文詠可念故端牘抽札以詮其
詠畧曰登武陽觀樂數峩嶺千蕤洋湖口命緋騎
駕白駒臨天水心踟躕千載後不如此段本註遺
失得古逸詩中道書所載
平蓋觀稠梗治皆武陽境

北史常景淹滯門下積歲不至顯官以蜀司馬相
如王褒嚴君平揚子雲皆有高才而無重位乃作
四君贊以託意按宋鮑昭仕亦不得志作蜀四
賢詠但昭合四賢為一篇景則人自為詠也

王楊盧駱初唐稱四傑無不入蜀中者唐詩紀事
稱高宗時王勃以檄鷄文斥出沛王府既廢客劍

南與盧照隣邵大震九月九日登玄武山旅眺詩
照隣為新都尉大震其同時人耳子安送杜少府
之任蜀州詩城闕輔三秦風烟望五津未下注脚
不知也丹鉛餘錄云大江自渝匯至犍為有五津
曰白華津萬里津江首津涉頭津江南津出華陽
國志王勃詩風烟望五津盧照隣文予自江陽言
歸五津皆指此無首句亦出華陽國志而用修未
之引也成都本治赤里街張若徒置少城內廣營
府舍修整里闌市張列肆得與咸
陽同制此即城闕輔三秦之意

賓王入蜀亦以使事至時昔篇中曾及之其曰地
角天涯渺難測者成都有此二石也游宦紀聞云
今之遠官及服賈者皆曰天涯海角蓋俗譚也頃
在成都嘗聞有天涯海角石暇時訪古及閱志圖
乃知天涯石在中興寺耆老傳云人坐其上則脚
腫不能行至今人不敢踐履又有天涯石在城東

對昭覺寺高六七尺有廟今入市人湯家園地角石舊有廟在羅城內西北角高三尺餘王均之亂為守城者所壞

今不復存矣

獨異記載子昂初入京不為人知有賣胡琴者價百萬豪貴傳視無辨者子昂突出謂左右曰輦轎千紵市之衆驚問答曰予善此樂皆曰可得聞乎曰明日可集宣陽里如期皆往酒肴畢具置胡琴於前食畢捧琴語曰蜀人陳子昂有文百軸馳走京穀碌碌塵土不為人知此樂賤工之役豈宜畱心舉而碎之以其文軸適贈會者一日之內聲華洋溢

蘇頲將赴益州題小園壁歲窮惟益老春至却辭家可惜東園樹無人也作花宋璟鄭惟忠俱有詩送之亦絕句也小許公有長樂花賦即蜀之旌節花

王維送李梓州詩萬壑樹叅天千山響杜鵑山中
一夜雨樹杪百重泉楊用修詩林振秀作山中一
大雨潼川志作山中一半雨千山響杜鵑作春聲
響杜鵑方輿勝覽作鄉音響杜鵑不知何所適從
漢女輸撞布李周翰曰漢女蜀之美女也漢書曰
秦置黔中郡漢興今大人輸布一疋小口二丈是
謂布即今
撞花布也

孟浩然途中晴詩已失武陵雨猶逢蜀坂泥天開
斜景遍山出曉雲低餘濕猶霑草殘流尚入谿今
宵有明月鄉思遠淒淒此曲盡蜀中之境非親到
者不知除夜有懷迢遞三巴路羈危萬里身或收
作孟浩然非此崔塗作
也塗蓋避亂入蜀云

天寶末明皇嘗乘月登勤政樓命梨園弟子歌數
闋有唱李嶠詩云富貴榮華能幾時山川滿目淚

沾衣不見祇今汾水上惟有年年秋雁飛時上春
秋已高問是誰詩或對曰李嶠因淒然泣下不終
曲而起曰李嶠真才子也明年幸蜀登白衛嶺覽
眺久之又歌是詞復言李嶠真才子不勝感嘆時
高力士在側
亦揮涕久之

明皇幸蜀劉長卿亦嘗侍從故有送史判官奏事
之靈武兼寄巴西親故詩時肅宗權制靈武也閭
中左綿皆得稱巴西長卿之親故有入蜀而未
至成都者耳詩云猶有西歸心遙懸夕陽外

李白本末傳記所載不同唐史稱白興聖皇帝九
世孫隋末以罪徙西域神龍初遁還客巴西既長
隱岷山蘓頌為益州長史見白異之更客任城與
孔巢父韓準裴政張叔明陶沔居徂徠山口沈飲
號竹溪六逸天寶初南入會稽與吳筠善筠被召
故白亦至長安往見賀知章知章見其文歎曰子

謫仙人也

東蜀楊天惠彰明逸事云元符二年春正月天惠
補令於此竊從學士大夫求問逸事聞唐李白本
邑人徵時募縣小吏入令卧內嘗驅車徑堂下令
妻怒將加詰責太白亟以詩謝云素面倚簾鉤嬌
聲出外頭若非是織女何得問牽牛令驚異不問
稍親招引侍研席一日賦山火詩思輒不屬太白
從旁綴其下句令詩云野火燒山去人歸火不歸
太白繼云焰隨紅日出烟逐暮雲飛令慙止頃之
從令觀漲有女子溺死江上令復吟詩二八誰家
女漂來依岸蘆鳥窺眉上翠魚弄口傍珠太白繼
云綠鬢隨波散紅顏逐浪無因何逢伍相應是怨
秋胡令滋不悅太白忽棄去隱居戴天大匡山往
來旁郡依湓江趙徵君巽亦節士任俠有氣善為
縱橫學著書號長短經太白從學歲餘去游成都

賦春感詩云茫茫南與北道直事難諧榆莢錢生
樹楊花玉糝街塵縈游子面蝶弄美人釵却憶青
山上雲門掩竹齋孟州刺史蘓頌見而奇之時太
白齒方少英氣溢發諸為詩文甚多徵類宮中行
樂詞體今邑所藏百篇大抵皆格律也雖頗體弱
然短羽襍襪已有雛鳳態淳化中縣令楊遂為之
引謂為少作是也遂江南人自名能詩累謫為令
云始太白與杜甫相遇梁宋間結交歡甚久乃去
客居魯徂徠山甫從嚴武成都太白益流落不能
歸故甫詩又云匡山讀書處頭白好歸來然學者
多疑太白為山東人又以匡山為匡廬皆非也今
大匡山猶有讀書臺而青廬鄉故居遺地尚在廩
為寺名隴西院有唐梓州刺史碑失其名及綿州
刺史高祝記太日子曰伯禽女曰平陽皆去蜀後
生有妹月圓前嫁邑子畱不去以故葬邑下墓
今在隴西院旁二百步外或傳院乃其所捨云

李白開元中謁宰相封一版上題曰海上釣鼈客
李白相問曰先生臨滄海釣巨鼈以何物為釣線
曰以風浪逸其情乾坤縱其志以虹霓為絲明月
為鉤又曰何物為餌曰以天下無義氣丈夫為餌
丞相
疎然

李白與人譚論皆成句讀如春葩麗藻
粲於齒牙時號李白粲花之論

唐人言李白不能屈身以腰間有傲骨

范傳正作李太白墓誌云白常欲一鳴驚人一飛冲天彼漸陸遷喬皆不能也及其謫退乃嘆曰千鈞之弩一發不中則當摧撞折牙而求息機安能効碌碌者蘓而復上哉用是脫屣軒冕釋羈韁鎖因肆性情大放於宇宙間意欲耗壯心而遣餘年此數語足以盡白之為人矣劉全白有李翰林墓

碣記云太白廣漢人性倜儻知縱橫術善賦詩才
調逸邁往往興會屬詞恐古之善詩者亦不逮裴
敬有李白墓碑曰白為詩格高旨遠若在天上市
外任華送李白之曹南序曰彼碌碌者徒見三河
之遊倦百鎰之金盡乃議子於得失虧成之間曾
不知才全者無虧成志全者無得失進與退於道
德乎何有以上諸文附見李白集古本有之今不
傳矣全白指太白為廣漢人蓋唐世彰明縣屬廣
漢郡故獨舉
郡為稱耳

李太白初自蜀至京師舍於逆旅賀監知章聞其
名首訪之既奇其姿復請所為文出蜀道難以示
讀未竟稱歎者數四號為謫仙解金龜換酒與傾
盡醉期不問日由是稱譽光赫賀又見其烏棲曲
嘆賞苦吟曰此詩可以泣鬼神矣故杜子美贈詩
及焉曲曰姑蘇臺上烏棲時吳王宮裏醉西施吳

歌楚舞歡未畢西山欲銜半邊日銀箭金壺漏水
多起看秋月墜江波東方漸高奈樂何或言是烏
夜啼二篇未知孰是故兩錄之烏夜啼曰黃雲城
邊烏欲棲歸飛啞啞枝上啼機中織錦秦川女碧
紗如烟隔窓語停梭悵然憶遠人獨宿空房淚如
雨白才逸氣高與陳拾遺齊名先後合德其論詩
曰梁陳以來豔薄斯極沈休文又尚以聲律將復
古道非我而誰與故陳李二集律詩殊少嘗言興
寄深微五言不如四言七言又其靡也況使束於
聲調俳優哉故戲杜曰飯顆山頭逢杜甫頭戴笠
子曰卓午借問別來太瘦生總為從前作詩苦蓋
譏其拘束也明皇聞之召入翰林以其才藻絕人
器識高茂便以上位處之故未命以官嘗因宮人
行樂謂高力士曰對此良辰美景豈可獨以聲伎
為娛倘時得逸才詞人諫出之可以誇耀於後遂
命召白時寧王邀白飲酒已醉既至拜舞頽然上

知其薄聲律謂非所長命為宮中行樂五言律詩
十首白頰首曰寧王賜臣酒今已醉倘陛下賜臣
無畏始可盡臣薄技上曰可即遣二內臣掖扶命
研墨濡筆以授之又令二人張朱絲欄於其前白
取筆抒思畧不停綴十篇立就更無加點筆迹道
利鳳跂龍拏律度對屬無不精絕常出入宮中恩
禮殊厚竟以踈縱乞歸上亦以非廊廟器優詔罷
遣之後以不羈流落江外又以永王招禮累謫於
夜郎及放還卒於宣城杜
甫所贈二十韻備叙其事

太白渡金門詩仍連故鄉水萬里送行舟送人之
羅浮詩爾去之羅浮余還憇峨眉又淮南卧病懷
寄蜀中趙徵君璣詩云國門違天外鄉路遠山隔
朝憶相如臺夜夢子雲宅皆寓懷鄉之意趙璣梓
州人字雲卿精於數學與白齊名蘓頰
薦西蜀人才疏云趙璣術數李白文章

李白名播海內明皇於便殿召見神氣高朗軒軒然若霞舉上不覺忘萬乘之尊因命納屨白遂展足與高力士曰去靴力士失勢遽為脫之及出指白謂高力士曰此人固窮相白前後三擬詞選不如意悉焚之唯留恨別賦及祿山反襲胡無人言太白八月敵可摧及祿山死太白蝕月衆言李白唯戲杜考功飯潁山頭之句成式偶見李白詞亭上宴別杜考功詩曰我覺秋興逸誰言秋興悲山將落日去水共晴空宜烟歸碧海夕鴈度青天時相失各萬里茫然空爾思

閻丘師詩云鳳藏丹穴暮龍去白水渾蓋稱均之文也均亦曾至雲南有刺史王仁求碑文鑿王墓碑文皆均筆也出升菴詩話按成都文類均銅梁人武后朝為太常博士與杜審言同年均善書即碑碣甫時尚存曾在成都與甫為通家來往

杜石笋行雨多往往得瑟瑟按華陽記開明氏造
七寶樓以珍珠結成簾漢武帝時蜀郡火燒數千
家樓亦以燼今人往往於砂土上獲珍珠又趙清
獻蜀都故事石笋在衙西門外二株雙蹲云珍珠
樓基也昔有人於此立寺為大秦寺其門樓十間
皆以珍珠翠碧貫之為簾後摧毀墜地至今基脚
在每有大雨其前後人多拾得珍珠瑟瑟金翠異
物余謂石笋非為樓設而樓之建適當石笋附近
耳蓋大秦國多瑇瑁琅玕明珠金碧水道通益州
永昌郡則寺疑此國人所建也杜詩註嘗引酉陽
雜俎謂蜀少城飾以金璧珠翠
桓溫怒其太侈伐之事為證

四月十九日成都謂之浣花遨頭宴於杜子美草
堂滄浪亭傾城皆出錦繡夾道自開歲宴游至是
而止故最盛於他時予客蜀數年屢赴此集未嘗
不賸蜀人云雖戴白之老未嘗見浣花日雨也

杜子美愁坐詩曰高齋常見野愁坐更臨門十月
山寒重孤城水氣昏葭萌氏種迥左擔犬戎屯終
日憂奔走歸期未敢論葭萌左擔皆地名葭萌人
知之左擔人罕知也注者或改作武擔又改作立
擔皆可笑按太平御覽引李猶蜀記云蜀山自綿
谷葭萌道經險窄北來擔負者不容易肩謂之左
擔道又李公印益州記云陰平縣有左擔道其路
至險自北來者擔在左肩不得度右肩常瘡南中
志云有焚道至朱提有水步道水道有黑水及羊
宮水至險難行步道度三津亦艱阻故行者謠曰
猶溪亦水盤蛇九曲盤羊烏龍氣與天通庾降賈
子左擔七里又有牛叩頭馬搏頰坂其險如此據
三書是左擔有三綿谷一也陰平二也朱提三也
義則一而已朱提今之烏撒雲貴往來之西路也
子美題忠州龍興寺所居院壁詩云忠州三峽內
井邑照雲根今其驛名曰雲根驛有筆名雲根筆

蜀江三峽中水波圓折者名曰盤盤音漩杜詩盤
渦驚浴底心性張嶺黃牛峽詩盤渦逆入嵌堂地
斷壁高分

繚繞天

杜甫出瞿唐峽詩五雲高太甲六月曠搏扶注不
解五雲之義嘗觀王勃益州夫子廟碑云帝車南
指道七曜於中階華蓋西臨藏五雲於太甲酉陽
雜俎謂燕公讀碑自帝車至太甲四句悉不解訪
之一公一公言北斗建午七曜在南方有是之祥
則無位聖人當出華蓋以下卒不可悉愚謂老杜
讀書破萬卷自有所據或入蜀見此碑而用其語
也晉天文志華蓋在旁六星曰六甲分陰陽而配
節候太甲恐是六甲一星之名然未有考證以一
行之遽於星歷張燕公段柯古之殫見洽聞而猶
未知焉姑闕
疑以俟博識

杜少陵將何將軍山林詩雨拋金鎖甲苔卧綠沈
鎗竹坡周少隱詩話云甲拋於雨為金所鎖鎗卧
於苔為綠所沈有將軍不好武之意此替者之言
也薛氏補遺云綠沈精鐵也引隋書又帝賜張淵
綠沈之甲趙德麟侯鯖錄綠沈為竹引陸龜蒙詩
一架三百竿綠沈森杳冥雖少有據然亦非也予
考之綠沈乃畫工設色之名鄴中記云石虎造象
牙梳枝扇或綠沈色或木蘭色或紫紺色或鬱金
色王羲之筆經云有人以綠沈漆管見遺南史梁
武帝西園食綠沈小是綠沈即西瓜皮色也梁簡
文詩吳戈夏服箭翼馬綠沈弓虞世南詩綠沈明
月絃劉劭趙都賦弩有黃間綠沈沈若如薛與趙之
說鐵與竹豈可為弓絃耶楊巨源詩吟詩白羽扇
校獵綠沈鎗與杜少陵之句同皆謂以綠沈色為
漆飾鎗柄耳

杜子美元都壇歌云子規夜啼山竹裂王母晝下
雲旗翻說者多不曉王母或以為瑤池之金母也
中官陳彥和言頃在宣和間掌禽苑四方所貢珍
禽不可殫舉蜀中貢二種鳥狀如燕色紺翠尾甚
多而長飛則尾開裊裊如兩旗名曰王母則子美
所言乃此禽也蓋遐方異種人罕識者子規夜啼
山竹裂言其聲清越如竹裂也此墨莊漫錄所解
余閱峩山記云漢寶誼放浪不羈月夜聞子規啼
曰竹裂吾可歸峩眉是夕竹裂天明遁去武帝三
徵之不起老杜引此竹裂與旗翻字對始不偏重
蕪東坡泊舟夔峽聞有人吟江流石不轉遺恨失
吞吳之句曰予杜子美也世人多誤解予詩謂先
主伐吳不利以此為恨非也蓋武侯之志在於中
原欲結東吳為外援伐之轉失策耳武侯曰若法
孝直在可免此行

杜甫子宗武以詩示阮兵曹兵曹答以石斧一具
隨使併詩還之宗武曰斧父斤也兵曹使我呈父
加斤削也俄而阮聞之曰誤矣欲子砍斷
其手此手若存天下詩名又在杜家矣

繁知一蜀之巫山人贈白樂天詩云忠州刺史今
才子行過巫山必有詩為報高唐神女道速排雲
雨候清辭樂天見之邀繁生同舟且曰巫山有王
無競沈佺期皇甫冉李端四詩竟不肯作古人之
服善無我如此沈與皇甫李端詩人多知之王無
競一首罕傳今錄於此神女下高唐巫山正夕陽
徘徊行作雨婉戀逐襄王電影江前落雷聲峽外
長朝雲無處所臺殿鬱蒼蒼樂天取此在佺期三
子之上
信哉

後唐張玉立嘗曰朝廷不用憂巴蜀稱霸何曾是
蜀人人以為名言亦皆謂蜀人忠義固臣子之常

分知不知庸何恤哉蜀人為蜀都辯將以發左思抑蜀黜吳借魏諛晉焉耳士之生蜀者其自今宜知所愛重毋使後人辯今猶今辯昔焉

唐子西丈采風流人謂小東坡劉彝叔曰唐子西善學東坡量力從事雖少自成一家其詩工於屬對緣此遂無古意後邛劉氏曰子西諸文皆高不獨詩也其出稍晚使及坡門當不在秦晁之下竹溪林氏曰唐子西學東坡者也得氣骨而未盡其變態之妙間有直致處然無一點塵俗亦佳作蘓軾飛白御書記抱烏號之弓不若藏此筆寶曲阜之履不若傳此書考追蠡以論音聲不若推點畫而究觀所用之意存昌歎以追嗜好不若因褒貶而想其所與之人或藏於名山或流於四方凡若此者皆當聳然而作如望旄頭之塵屬車之音相與勉為忠厚而恥為浮薄或由此也夫

高太尉駢崇文曾孫也鎮蜀日以蠻夷侵暴乃築
羅城四十里朝廷雖加恩賞亦疑其固護一日奏
樂聞樂聲知有改移光乃題風箏寄意曰夜靜絃
聲響碧空宮商信任往來風依稀似曲繞堪聽又
被風吹別調中旬
日果移鎮渚宮

閒說邊城苦如今到始知好將筵上曲唱與龍頭
兒此薛濤在高駢宴上聞邊報樂府也文諷諭而
不露得詩人之妙使青蓮見之亦
當印可元白紛紛停筆不亦宜乎

元稹開西蜀薛濤有辭辭及為監察使蜀以御史
推鞠難得見焉嚴司空潛知其意每遣薛往洎登
翰林以詩寄曰錦江滑膩我眉秀幻出文君與薛
濤言語巧偷鸚鵡舌文章分得鳳凰毛紛紛詞客
多停筆箇箇公侯欲磨刀別後相思隔烟水菖蒲
花發五雲高白居易有詩與薛濤云我眉山勢接

雲霓欲逐劉郎此路迷若似剡中容易到春風猶隔武陵溪

五溪論事云蜀尚書侯繼圖本儒士一日秋風四起偶倚闌於大慈寺樓有大桐葉飄然而墜上有詩云拭翠斂雙蛾為鬱心中事搦管下庭除書成相思字此字不書石此字不書紙書向秋葉上願逐秋風起天下有心人盡解相思死天下負心人不識相思意有心與負心不知落何地侯貯小帖凡五六年方卜任氏為婚嘗諷此詩任氏曰此是妾書葉詩怎得在公處曰向在大慈寺閣上倚闌得之即知今日聘卿非偶然也侯以今書較之與葉上無異

元稹為御史鞠獄梓潼樂天昆仲送至城西而別後旬日昆仲與李侍郎建開游曲江及慈恩飲酣作詩曰花時同酌破春愁醉折花枝作酒籌忽憶故人天際去計程今日到梁州後旬日得元書果

以是日至褒仍寄詩曰夢君兄弟曲江頭也到慈恩寺裡遊驛吏喚人排馬去忽驚身在古梁州千里覓交合若符契白有感夢記備叙其事

段文昌太尉鎮益州有還別業尋龍華山寺廣宣上人詩云十里惟聞松栢風江山忽轉見龍宮正與休師方話舊風烟幾度入樓中郭震亦有題華山詩曰昔年曾到此山回百鳥聲中酒一杯最好寺邊開眼處段文昌有讀書臺

太尉李德裕出鎮渚宮嘗謂賓侶曰余偶欲賦巫山神女一詩下句云自從一夢高唐後可是無人勝楚王晝夢宵征巫山似欲降者何如段記室成式曰屈平流放湘沅椒蘭久而不芳卒葬江魚之腹為曠代之悲宋玉則招屈之魂明君之失恐禍及身遂假高唐之夢以感襄王非真夢也我公作

神女之詩思神女之會惟慮成夢亦
恐非真李公退慙其文不編集於卷

該聞錄云段文昌鎮成都子成式好獵丞相患之
成式以所獲雉兔分送幕僚各致書援引故事甚
悉幕僚多不曉其意以
呈丞相方知其子博學

成式酉陽雜俎云故相李公賞揚州秀才蒯希逸
詩蟾蜍醉裏破蝴蝶夢中殘每坐吟之予請客各
吟近日佳句因記蜀中客龐季予每
云寒雲生意滿秋草長難高之句

楚水巴山烟雨多巴人能唱本鄉歌今朝北客思
歸去回入紇那披綠蘿比劉禹錫竹枝詞也紇那
當時曲名劉詩翻南調為北調
二字皆叶平聲此隨方轉言也

楊柳枝詞有三條陌上拂金羈萬里橋邊映酒旗
此日令人腸欲斷不堪將入笛中吹此閨中膝邁

之作而劉采春歌之也

藕花衫子柳花帟多著沈香慢火薰惆悵裝成君
不見空教綠綺伴文君此李餘臨邛怨也玉淪江
上雨絲絲公子遊春醉不知剪渡歸來風正急水
濺鞍帕嫩鵝兒此餘寒食詩也餘成都人元微之
稱蜀士李餘劉猛工為新樂府餘詩僅傳
二首出絕句演義按汶江謂之玉淪江

唐學士元庭堅左遷遂州叅軍讀書郊外忽見有
人身而鳥首來造者曰吾衆鳥之主也聞君好音
律故來見君因畱數朝教以音律清濁庭
堅後遂著韻英今遂寧鳳臺鋪有遺跡

金堂三學山盤陀石上刻詩一首云拔地山巒秀
排空殿閣斜雲共數州雨樹獻九天花夜月摩峯
頂秋鐘徹海涯長松拂星漢一一仙槎下註作
者姓名年代要非唐人不能辨也本刻九天二字

提頭想必隨
駕入蜀者

徐畊成都人生二女皆國色教之為詩有藻思王
建入蜀聞之納於後房生衍及衍嗣位尊為太后
太妃同行禱青城山遊丈人觀元都觀金華宮丹
景山至德寺各有倡和詩刻石次至漢州三學山
夜看燈太后詩曰周遊靈境散幽情千里江山暫
得行所恨風光看未足却驅金翠入龜城太妃詩
曰翠驛江亭近蜀京夢魂猶是在青城
比來出看江山景却被江山見出行

僧貫休入蜀上王建詩曰一瓶一鉢垂垂老萬水
千山得得來建大悅賜號禪月因名為得得和尚
偽蜀武成二年王建遊龍華禪院召貫休賜坐及
茶藥綠段仍令口誦近詩時諸王貴戚皆在貫休
欲調之因誦公子行曰錦衣鮮華手擎鵝開行氣
貌多輕忽稼穡艱難總不知五帝三王是何物建

稱善貴倖皆惡之貫休本蘭溪人
善詩與齊已齊名有西岳集十卷

王蜀樞密使潘岢字凝夢溺於美妾解愁夙恙成
疾解愁姓趙氏其母夢吐海棠花葉而生有國色
善為新聲又工小詞建嘗至岢第見之謂曰朕宮
無如此人意欲取之岢曰此臣下賤人不敢以薦
於君其實靳之弟峭謂曰綠珠之禍可不戒耶岢
曰人生貴於適志豈能愛死而自不足於心耶人
皆服其
有守

王蜀相周庠初在邛南幕中畱司府事時臨邛縣
送失火人黃崇嘏纔下獄便貢詩一章曰偶離幽
隱住臨邛行止堅貞比澗松何事政清如水鏡絆
他野鶴向深籠周遂召見稱鄉貢進士年二十許
祇對詳敏即令釋放後數日獻歌周極奇之召於
學院與諸生日相伴善碁琴妙書畫翌日薦攝府

司尹叅軍頗有三語之稱胥吏畏服案牘麗明周
既重其英聰又美其風采在任將逾一載遂欲以
女妻之崇嘏又袖封狀謝仍貢幕府若容為坦腹
願天速變作男兒詩一篇周覽詩驚駭不已遂召
見詰問乃黃使君之女幼失覆蔭惟與老妣同居
元未從人周益仰貞潔郡內咸歎異旋乞罷歸臨
邛之舊隱竟
莫知存亡焉

唐張元寶貞元間詩人詩多不傳唯有寒食詩一
首寒食清明倍惘然海棠風落小花鈿如今獨有
孤魂在牛落
嘉陵半錦川

五代眉山楊義方舉進士仕蜀長於詩自以才過
羅隱嘗有春詩云海邊紅日半離水天外暖風輕
花到

乾德五年重陽王衍宴羣臣於宣華殿夜分未罷
衍自唱韓琮柳枝詞曰梁苑隋隄事已空萬條猶
舞舊春風何須思想千年事惟見楊花入漢宮內
侍朱光溥詠胡僧詩曰吳王恃霸棄雄才貪向姑
蘓醉綠醕不覺錢塘江上一宵西

送越兵來衍聞之不樂於是罷宴

後梁秦隴間謠謠引黑牛天差不自由但看戊
寅歲颺在蜀江頭朝野僉載曰竹龜生深山取之
甚艱秦隴之地此物爭出或穿墉壞城或自門闥
而入犬食不盡則並入人家房內秦民之口腹飲
焉故童謠云云庚午歲劉知俊叛梁入秦天水
入蜀王建殺之粉其骨颺入蜀江正戊寅歲也
王建據蜀之後有一僧常持大帚每過即汎掃人
以掃地和尚目之掃畢輒寫云水行仙怕秦川其
後王衍秦川之禍人
方悟水行仙衍字也

孟蜀廣政元年上巳昶游大慈寺宴從官於玉溪院賦詩十二年游浣花溪御龍舟觀水嬉珠翠綺羅名花異卉環列十里人望之如神仙之境昶曰曲江金殿鎖千門殆未及此兵部尚書王廷珪賦詩十字水中分島嶼數重

花外見樓臺昶稱善久之

孟蜀後主崇尚六經恐石經本傳流不廣乃易為木板宋世稱刻本書始於蜀也昶嘗曰我不效王衍作輕薄小詞乃敕史館集古今韻會五百卷惜不傳今所傳昭武黃公邵者乃輯略耳

正德戊寅予訪余方池編修於武侯祠見壁間有詩云劍江春水綠沄沄五丈原頭日又曛舊業未能歸後主大星先已落前軍南陽祠宇空秋草西蜀關山隔暮雲正統不慙傳萬古莫將成敗論三分後有題云此詩始終皆武侯事子美或未過之惜不知其名氏

凡仙詩每每有佳者蓋丈人之沈魂滯魄所附也
周養春嘗親見腫臃律云露下天高夜未中鼎壺
寒魄見腫臃月魂點化三生夢神步遨遊萬里風
蘸水溪山凝黛綠醉霜楓葉染丹紅此時正好吟
秋興還上蓬萊第一峯楊宜菴見賦一律云鶴駕
遠辭春洞口綵雲常護畫樓頭書案時親周孔面
琴書日寫水山愁柳隄帶露閒鶯語明月依林照
鶴眸幾回欲傍浮鷗去又遇黃梁對笛游其情狀
皆可想見宜菴又云太和吳臯河名懋李中溪之
壻也作順慶三府卒於官有年矣一日附箕題云
辛苦一官竟殞身吾鄉猶有未招魂月明空傍寒
鴉宿風冷徒依野樹墮百姓未能沾厚澤微軀何以
報朝廷託君為向僚寅說好把幽人念
一聲時胡廬山督學感此遂入名宦祀

少海任太史嘗葛中訪僧於山寺行者固求名姓
公書絕句於壁云兩字虛名動五湖等閒不許俗

人呼山僧若問真消息天子臺前講御書具師歸
讀之知其為任內翰也走謝之會試歲有羣友北
上舟次赤壁者月夜慕東坡故事狂歌醪飲聲達
於黃州守禦者次蚤走卒持牌行拘迺即牌陰草
一律覆云舟泊蘆花淺水溪友人約我泛清卮高
歌赤壁兩篇賦正是黃州半夜時城上將軍陰
有約江邊士子總無知君侯若問真消息曾有芳
名到鳳池卒持覆州守遂躬謝而厚禮之又內江劉
怡溪僉憲為書生時家極貧授徒於一邨叟家叟
一日以襦襦孫戲云候大為公門徒公忿然曰我
豈終於此乎題云飲馬清河日已長神機忽動月
樓觴卷懷道義山河重出手經綸社稷康陳蔡得
天須孔法會稽生伯敢吳忘英雄轉眼
風光別莫負鄉人笑老狂遂拂袖而去
蜀龍州土酋薛兆乾會書一揮使扇云我有龍泉
藏寶匣令人肝膽盡皆寒一朝提入中郎帳百萬

羣雄孰敢當蓋述呂純陽詩余初不知見而驚嘆以示窗友高子藩山藩山時亦總角驚曰此人反狀形矣必有大僂後果然其亦億中乎連然郡得冊頁一本皆書畫名筆蓋正德間物也上有豫章李士實及范香溪題蟬詩士實題云潮落灘高天色寒悄無人語到江干鍛鍛兵甲鳴相應萬里橫行信不難觀此則士實佐濠為逆之本態露矣香溪題云橫行靈稻雄稱關虎貪憐無厭化作田鼠吾將斫爾螯折爾股以除農殃分酣我酌此語似逆知其無君而誅之也愚按潮落天寒言其時之戚也悄無人語言謀之靜治也兵甲橫行言強不可禦也然取象於蟬何由萬里乎卒之支解族滅信如香溪斫螯折股之說矣可慨哉

少海任太史公館閣仙才也善長對聯其題清泉寺云水國中孤峯倒影似青螺浮鏡雄劍挿空此

江山天南第一烟霞外萬事忘機但短篷吹雲素
琴彈月這漁樵海內無雙題浮橋云江關雄棧聯
屯畫舫千尋直穿雲霧通三峽天塹長虹鎖斷滄
波萬頃不放春光下五湖又神京西下八千里見
烏鵲橫江夾岸烟花迎使節閭苑南來第一橋象
螭龍飲渭中天雲霧擁仙槎題書舍云杜陵草堂
大如斗海內知名又何須畫棟飛雲珠簾捲雨王
粲江樓不索錢書中有屋但願爾門庭奏賦虎觀
橫經別墅云大江東去浪淘盡千古英雄問樓外
青山山外暮雲何處是秦宮漢闕小院春深鶯喚
起一簾風月向花邊紅雨雨邊烟樹此中有舜日
堯天又大江東下一片石塵盡英雄說甚玉堂金
馬明月夜來數聲笛吹散星斗公然閬苑神仙

叙珙僧印滿大千江安人初不知書因讀觀音經
有悟遂能文有僧指八角磨盤七重行樹於室者

渠演之曰大道原空八角磨盤何處轉本來非有
七重行樹不須栽題水際觀音閣云曇影一江兜
率院天凝水月身香五分婆羅門女散旃檀題幟
筵云旋幟旋為若是不為何用幟非空非色但凡
有色豈成空佛殿云皇朝大一統三教數崇天子
壽萬年億兆稱頌僧舍云補衲迎紅日開窗堆白
雲又佛閣云白日住虛空千古慧光彌宇宙金身
來淨土三乘祕典遍河沙又題文昌祠云半壁拱
天心開北極圖書洞府六星明斗上應人間豪傑
昌期開口皆佳句也因憶巴中嘗有道人號雪蓑
者不知何許人詩文奇妙無塵俗語士夫爭奇之
嘗揭一聯於室曰雪裏披蓑寒動一天星斗雲間
補衲暖回大地山河
塵市有此等見解哉

嘗聞成都長老言曩溫少保修南宅於金津役里
坊咎詈不輟實家器公督之一日有老者運土畚

至稍遲又將答老者詭而言曰某取土最遠力竭
矣懇宥之冢器公曰取自何所曰取自萬閣老之
室公愀然遂遣里坊之役又某巡撫者索米醋於
錦官驛時應役者金堂杜刑部之裔以醋獻怒其
不佳也重箠之其人受杖訖斂衣泣詬曰此祖公
之遺我也巡撫公因詰之其人曰吾祖杜銘為尚
書不知威刑刻薄作何狀使我等受報如此巡撫
慙然遂不復有所索二事大畧相似可為恃勢陵
人者戒

今古人不相及豈但百年即十數載後人心之愈
趨愈下有若江河者因憶成都范浣溪溪翁與弟鹿
溪漁舟俱友趙某趙鄉薦未仕而卒范公昆弟即
倡率友人輩輪月授廩於其妻子其妻杜得以完
節厥子亦補府庠生此嘉靖年事也又半江祝公
仕至戶部主政宦資頗富而厥嗣最愚公寢疾悉

以篋笥屬之鳳野何公何公游宦又寄之鹿溪漁舟時半江公歿十數年矣祝子愚日甚然有慧男至嘉靖丁卯歲何公悉以所寄委之今試以此求之士夫間或不多得嘗舉此以籌之達事叟叟胡盧曰甚矣子之迂也利在則萬里靡遲利盡則籬籬弱水蠅逐蜂趨盡為利耳何范諸公安知有不目之為矯強之為駭者乎

詩識之說先輩非之確矣然亦有驗之事後如卜如見者曩余庚午北上過淇縣見蔣又溪戊辰下第詩一絕語頗自畫為之戲綴其傍曰莫道瓊枝不可攀東皇青眼正相看來年二月春風裏紫點征鞍作繡鞍及辛未正朔又溪抵都下喜謂余曰曩日詩人為更佳語矣余亦黠然是年會試甫畢又溪以母病遄歸中途得捷報非紫點征鞍作繡鞍乎癸酉馬鳳麓北上過岐陽寄詩於鄮且極美

詞林之盛余屬和之末云詞林勝槩何庸羨鳳閣
應須屬大工甲戌鳳麓登第考館不興而主政工
部以修乾清宮著績又劉晴川作諭太平署東鄉
縣遷安寧學正客有送之詩者云錦江春色來何
暮灩澦波濤興蚤收立馬郊原重候郭投錢山谷
好遺劉晴川三任過余始得薦揚春之暮也以太
平去官非灩澦波濤乎時蜀文宗郭
夢菊舊夔守也四句皆曲中又奇哉

宋江古心知吉州兼提舉就任改除江西漕使舟
經臨江慧力寺前風濤大作舟人恐請燒香許願
古心索紙筆書一詩云萬里為官徹底清舟中行
止甚分明如今若有虧心事一任碧波深處沈詩
繞投江浪即恬
靜徑達洪都

周太愚仁壽縣人自安肅令陞雲南劍州牧甫報
至即被論挈家歸渡黃河舟人以風濤止之太愚

卷四十五
咍一絕云試將心事白河神五年常祿半千金若
教此外豈宜入擬向洪濤一棹沈遂逆風而渡得
無恙殆亦有江古心之風乎丁丑春余自靈臺攜
得僕三隸一篋馳馬赴滇以兩晝夜出棧閣客有
愛余者以鬼虎盜危之余答以韻語云千里雲關
兩夜驅勞君為我慮瞿瞿青萍腰匣愁隅虎九曜
曾藏逐野狐點檢行囊無別物僅收宦劄并衣襦
綠林客遇應相笑此亦三秦令尹乎雖不敢希踪
先哲要亦心頭無愧也

保寧別駕師公名道立者由甲第任鹽城縣尹以
水災不待奏報而徑蠲民賦民德之然以此僅得
授若官亦殆矣常格寧有是哉曾署內江事時都
蠻亂撫臺檄之軍中以病辭然喜談長生久視之
術習誦石杏林詩語大州翁嘗贈以詩云官輕東
海三年水病懶西川六月師作吏風塵思度世參

同玄構
識篇詩

曾白邨為余言有高士某者隱居善塋嘗中秋無
酒對月喟云隔籬呼酒來烹芋又恐隣家索酒錢
不如與妻商確定閉門推
出月還天真曠達者哉

詹香山綿竹縣人為余言某寺有古柏一株縣令
將伐之造署蜀人莫敢逆者寺有老僧題一絕於
樹云定知此去棟梁材無復清陰覆綠苔只恐深
山明月夜悞他千里鶴歸來縣令見之惻然而止
又某節婦者哭夫瞽目老而殂有子登第痛母之
無聞也以詩丐傳於一老先生云其妻我母若為
倚我母何曾讀柏舟一點丹心隨父死百年殘喘
為孤留啼乾血淚雲生眼歷盡艱難雪滿頭願借
一言徵萬古青山不負老荒丘此詩字字酸辛可
泣鬼神苦心之語哉香山云動人語不在多贅如

欽定四庫全書

卷四十六

朱僊鎮岳武穆祠對聯云中
原百戰回戈地萬里孤忠飲恨祠又湯陰岳廟云
穀身已植君臣義生氣常來父母邦人讀之未有不感動者

升菴太史題聖燈寺云蒼烟叢裏聖燈紅火齊營軍照遠空元是楓林霜葉下露華光泣月明中又題栽眉山佛鳥云佛現佛現鳥語易隨人意愛山川發晶熒草木呈葱蒨坐使遊人心目亂佛現佛現觀二詩以放光事為誕妄矣及觀李中溪遊鷄足山記云正當六月詣巖殿致禱俄頃見兜羅錦雲緬平一面宛如玉地有大圓光倚立玉地之上外暈七重每重五色環中虛明如鏡凝觀者各見自身現於鏡中毛髮可數舉手動足影亦如之衆人同止唯見已身不見傍人僧云攝身光也有頃光沒風起壑中雲氣散盡林巒敗色鮮妍奪目復出一光如大虹霓光缺此光圓如水晶映物僧謂

此佛光也同行又見平雲上有二銀船檣柁皆具
如人掉之云劉小鶴公亦云守隴右時一日午衙
陡聽街民盛傳佛現起視之錦雲
罩一新寺天花閃爍而墜異哉

綿竹詹香山為西鄉令時上吏某者索賄於屬官
最苦公清介獨無所奉乃首被其窘折殊甚公怡
然久之拂袖去作愁虎吟以刺之云一入漢南如
虎穴西鄉虎穴更還深黃昏黑夜嘗驚犬白日青
天不怕人使我小心防出入任他大膽自縱橫不
知世有周公否猛獸能驅見太平此詩當不減巷
哉伯

杜工部和裴迪登州東亭送客逢早梅相憶見寄
詩云東閣官梅動詩興還如何遜在揚州按遜傳
無揚州事而遜集亦無揚州梅花詩但有早梅詩
云兔園標節序驚時最是梅銜霜當路發映雪凝

寒開枝橫却月觀花繞凌風臺應知早飄落故逐
上春來杜公以裴迪逢早梅而作詩故用何遜比
之又以却月凌風皆揚州臺觀名耳所謂東閣官
梅者乃新津之地非揚州有東閣也宋世有妄人
假東坡名作杜詩注一卷刻之一時爭尚杜詩而
坡公名重天下人爭傳之而不知其偽也其注此
詩云遜作揚州法曹廨舍有梅一株遜吟咏其下
後居洛思之因請再任及抵揚州梅花盛開相對
彷彿終日按何遜未嘗為揚州法曹是時南北分
裂遜為梁臣何得後居洛陽洛陽乃魏地也既居
魏何得又請再任請於梁乎請
於魏乎其說之脫空無稽如此

偽蘇中如謂不分桃花紅勝錦為李夫人之語十
年厭見旌旗紅為四皓語皆架空妄說如盲人風
漢之言然猶借古人名也又謂碧山學士為梁章
褒又昏黑應須到上頭為隋常琮語併人名亦杜

撰之又妄撰景差五言律一聯尤可笑蘇李始有五言古詩而楚襄王時乃有五言律乎其人信白丁也而讀者不之悟其奈之何

杜詩關山同一點點字絕妙東坡亦極愛之作洞仙歌云一點明月窺人用其語也赤壁賦云山高月小用其意也今書坊本改點作照語意索然且關山同一照小兒亦能之何必杜公也幸草堂詩餘註可證

蜀中杜處士好書畫所寶以百數有戴嵩牛一軸尤所愛錦囊玉軸常以自隨一日曝書畫有牧童見之撫掌笑曰此畫鬪牛也牛鬪力在角尾搖入兩股間今乃掉尾而鬪謬矣處士笑而然之占語云耕當問奴織當問婢不可改也

欽定四庫全書

卷四十六

亡友安公石嘉州人妙於集句以鱸魚正美不歸
去對瘦馬獨吟真可哀又請君酌我一斗酒與爾
同消萬古愁又梁間燕子聞長歎李義山樓上花枝
笑獨眠水國蓮花府韓偓雲帆楓樹林杜工
又集杜句弔葉叔晦讀者爲之泣下其詩云臨江
把臂難再得便與先生成永訣文章曹植波浪濶
死爲星辰亦不滅老去新詩誰與傳男兒性命絕
可憐出門轉盼已陳迹山中妻子哭向天中夜起
坐萬感集人生有情淚沾臆鳳凰麒麟安在哉石
田茅屋荒蒼苔君不見赤牆日色晚悲風爲我從
天來

合璧事類載杜工部詩云三月雪連夜未應傷物
華只緣春欲盡畱著伴梨花此詩舊集不載又寒
食少天氣春風多柳花又小桃知客意
寒盡始開花則今之全集遺逸多矣

坡公亟稱文與可之詩而士罕傳丹淵集余家有
之其五言律有韋蕪州孟襄陽之風信坡公不虛
賞也今錄其數首於此詠閒樂云晝睡欲過午好
風吹竹床溪雲生薄暮山雨送微涼粉裯衣裳潤
蘭薰枕席香歸來閒且樂多謝墨君堂過友人谿
居云籬巷隔荻蒲閒扉掩自娛水蟲行插岸林鳥
過提壺白浪搖秋艇青烟葢晚廚主人誇野飯爲
我煮秋鱸晚次江上云宛轉下江岸霜風繞人衣
翩翩渚鴻壓閃閃林鴉歸前壑已重靄遠峯猶落
暉孤舟欲何向擘浪去如飛玉峯園避暑值雨云
南園避中伏意適晚忘歸牆外谷雲起簷前山雨
飛興饒思秉燭坐久欲添衣爲愛東岩下泉聲通
翠微極寒云燈火宜冬杪圖書稱夜長簾鉤掛新
月窻紙漏飛霜酒醴慙孤宦瓊裘逐異鄉誰知舊
山下梅艷滿東牆江上主人云客路逢江國人家
占畫圖青林隨遠岸白水滿平湖魚小猶論尺鷁

輕欲問銖何時遂休去來此伴潛夫詠梨花云素
質靜相依清香暖更飛笑從風外歇啼向雨中歸
江令歌瓊樹甄妃夢玉衣畫堂明月地常此借芳
菲詠杏花云仙杏一番新妖嬈洗露晨待粧嫌粉
重欲點要酥勻月淡斜分影池清倒寫真君須憐
舊物曾伴曲江春此八詩置之開元諸公集中殆
不可別今曰宋
無詩豈其然乎

蘇東坡詩八首大率皆田中語其第四首云種稻
清明前樂事我能數晴空暗春澤計水聞好語分
秧及初夏漸喜風葉舉月明看露上一珠垂縷
秋來霜穗重顛倒相撐柱但聞畦墉間蚱蜢如風
雨新春便入甄玉粒照筐筥云此詩叙田家自清
明至成熟曲盡其趣注未盡發其妙今補之於左
浙喜風葉舉秧初立苗後得風則長呂氏春秋所
謂禾心中央疏爲冷風是也月明看露上農夫云

秧苗得露皆先潤其根由根上節至葉稍垂一點
月明窺見其上洪舜俞平齋集有魏城晚涼倚窗
觀稼二絕云晚風不動稻苗平葉葉頭邊沉澹明
井養不窮功用在誰將易象細推評又飛明一點
上苗端難作尋常露雨看碧眼道人參解得黃河
夜半沂崑端以此補坡詩註真妙也此事奇坡詩
詠之奇平齋二詩註
之又奇特表出之

瑞香花卽楚辭所謂露甲也一名錦薰籠又名錦
被堆韓魏公詩云不管鶯聲向曉催錦衾春曉尚
成堆香紅若解知人意睡取東君莫放回張圖之
改瑞香爲睡香詩云曾向廬山睡裏聞風香占斷
世間春探花莫撲枝頭蝶驚覺陽臺夢裏人陳子
昂詩宣和殿裏春風早紅錦薰籠二月時流落人
間真說事九秋風露却相宜蓋詠九日瑞香也余
亦有詩云小屏殘夢暖香中花氣撩人怯曉風繡

被堆春蝴蝶散開簾忽見錦薰籠又唐人詩云誰
將玉膽蓄薇水新濯瓊肌錦繡禪體物既工用
韻又奇可謂絕唱矣

東坡云老杜自秦川越成都所歷輒作一詩
數千里山川在人目中古今詩人殆無其比

明皇遣吳道子畫蜀山川歸對大同殿索其畫無
有曰在臣腹中請疋素寫之半日都畢後明皇幸
蜀經其地無不與畫脗合因知道子之神奇也

丁未年彭州倅鄭昭請張野人道隱圖真龍於城
西天山府君之祠爲民致雨於是道隱與二道秉
燭以畫使人桼鼓噴笛頗足起舞其夕三更果風
雨大沛奈何一時之戲亦濟農事蔣貽恭畱詩曰
世人空解競丹青惟子通元得墨靈應有鬼神看
下筆豈無風雨助成形成威疑噴浪歸滄海勢欲挐

雲上杳冥靜閉綠窻深夜後曉來簾幕似聞腥道
隱不事談論不與人交往不冠帶不拜跪人謂之
探頭相國李昊爲著名道隱平生讀莊老之書性
好圖龍興思忽至卽畫百尺之狀任意揮寫飄飄
然雲陰雨氣似蜿蜒之勢擲筆撫掌以
此爲適撰進龍證筆訣三卷傳於家

建隆初有人泊舟巴峽夜聞人詠曰秋徑堆黃葉
懸崖露草根猿聲一叫斷客淚數重痕通宵凡吟
百過又有梁伯升者肄業廢宅中夢一女子綠帶
紅袖呼梁君聽妾幽恨之句詩曰卜得上峽日秋
來風浪多江陵一夜雨腸斷木蘭歌一

張乖崖公布衣時素善陳搏嘗因夜話謂搏曰我
欲分先生華山一半住得無搏曰餘人則不可先
輩則可及旦取別搏以宣毫十枝白雲臺墨一劑
蜀箋一角爲贈公謂搏曰會得先生意取某入關

處去曰珍重搏送公回謂弟子曰斯人無情於物
達則爲公卿不達爲王者師公常感之後尹蜀乘
傳過華陰寄搏詩曰性愚不肯林泉住強要清流
擬致君今日星馳劍南去回頭慚愧華山雲又傳
公席上贈官妓小英歌曰天教搏百媚相映明如
花住近桃花坊正面門庭掩映如仙家美人宜稱
言不得龍腦薰衣香入骨維楊軟縠如雲英毫郡
輕紗似蟬翼我疑天上婺女星之精偷入筵中名
小英又疑王母侍兒初失意謫向人間爲歌妓不
然何得膚如紅玉初碾成眼似秋波雙臉橫舞態
因風欲飛去歌聲遏雲長且清有時歌罷下香砌
幾人魂魄遙相驚人看小英心已足我見小英心
未足爲我高歌送一栢我今贈汝新翻曲按公鐵
石心人在蜀娶婢三年後歸其父猶然完璧此詩
亦靖節閒情廣平梅花之意也然歲華紀麗
稱浣花人遊江起於公蓋亦不厭游戲云

方輿勝覽載公在蜀有錄曹叅軍老病廢事公責之曰何故不歸明日叅軍求去且以詩畱別其畧云秋光多似宦情薄山色不如歸興濃公驚歎曰吾過矣同僚能詩而吾不知乃畱而慰薦之蜀人魏野從萊公游陝府僧舍各有畱題後復同遊見萊公詩已用碧紗籠護而野詩獨否塵昏滿壁時有從行官妓頗慧黠即以袂就拂之野徐曰若得常將紅袖拂也應勝似碧紗籠萊公大笑文彥博慶厯間知益州多燕集有飛語至京師御史何鄭聖從謁告歸里上道伺察之張俞少愚潞公客也迎見聖從於漢州有官妓楊姓者善舞聖從喜之少愚因取項怕題詩曰蜀國佳人號細腰東臺御史惜妖嬈從今喚作陽臺柳舞盡香風萬萬條後數日聖從至成都頗嚴重一日潞公大作樂以宴之迎此妓雜府妓中歌少愚之詩以酌聖從每為之醉及還朝潞公之謗乃息此與陶穀使

江南事
頗同

范景仁鎮喜為詩年六十三致仕一朝思鄉里遂輕行入蜀故人李才元大臨知梓州景仁枉道過之歸至成都日與鄉人樂飲散財於親舊之貧者遂遊峩眉青城山下巫峽出荆門凡期歲乃還京師在道作詩凡二百五篇其一聯云不學鄉人誇駟馬未饒吾祖泛扁舟此二事他人所不能用也仁壽龍昌期初謁王荊公安石投刺稱詩人左右曰何物書生敢於丞相前稱詩人耶公揖之入值軍人運沙遂命賦此應聲云茫茫黃出塞漠漠白鋪汀鳥去風平篆潮回日射星公大稱賞之老泉攜東坡潁濱謁文定公時方習制科業將應詔文定公忽出題令人持興坡潁云請學士擬試文定密於壁間窺之兩公得題各就坐致思潁於一題有疑指以示坡坡不言但舉筆倒敲几上云

管子註穎濱疑而未決又指其次東坡一筆勾去即擬撰出以納文定閱其文益喜勾去一題乃無出處文定欲試之也次日文定見老泉云二子皆天才長者明敏尤可愛然少者謹重成就或過之所以二公受知文定而穎濱感之尤深

蘇明允至和間來京師既為歐陽文忠公所知名翕然韓忠憲諸公皆待以上客嘗遇重陽忠憲置酒私第惟文忠與一二執政而明允乃以布衣參其間都人以為異禮席間賦詩明允有佳節屢從愁裏過壯心時傍醉中來之句其意氣尤不少衰明允詩不多見然精深有味語不徒發正類其文如讀易詩云誰為善相因嫌瘦後有知音可廢彈婉而不迫哀而不傷所作自不必多也

東坡送戴蒙赴成都玉局觀詩云拾遺被酒行歌處野橋官柳西郊路聞道華陽版籍中至今尚有

城南杜費著氏族譜稱少陵之後者係宗武所傳予閱眉州志杜莘老青神人甫十三世孫東坡後

亦提舉玉局觀未赴

東坡云趙伯成家有麗人僕忝鄉人不肯開樽徒吟春雪美句因次其韻一笑詩云朱簾繡戶未曾開誰見梅花落鏡臺試問高吟三十韻何如低唱兩三桮莫嫌衰鬢聊相映須得纖腰與共圓知道文君隔青鎖梁園賦客肯言才仍自注其末聊答來句義取婦人而已罪過罪過

蘓小妹老蘓先生之女幼而好學慷慨能文適其母兄程濬之子之才先生有詩曰汝母之兄汝伯舅求以厥子來結姻鄉人嫁娶重母族雖我不肯將安云人言蘓子無妹却有此詩文同與可蜀人與蘓子瞻厚為人靜深超然不撓世故善畫墨竹作詩騷亦過人熙寧初時論既不

一士大夫好惡紛然同在館閣未嘗有所向背時
子瞻數上書論天下事退而與賓客言亦多以時
事為譏誚同極以為不然每苦口力戒之子瞻不
能聽也出為杭州通判同送行詩云北客若來休
問事西湖雖好莫吟詩及黃州之
謫正坐杭州詩語人以為知言

大邑鶴鳴觀所謂張天師鶴鳴化也其東北絕頂
又有上清宮壁間有文與可題一絕曰天氣陰陰
別作寒夕陽林下動歸鞍忽聞
人報後山雪更上上清宮上看

漢嘉城西北山麓有一石洞泉出其間時聞洞中
泉滴聲良久一滴清如金石黃魯直題詩云古人
題作東丁水自古東丁直到今我
為改名方響洞要知山水有清音

紹聖二年四月甲申山谷以史事謫黔南道間作
竹枝詞二篇題歌羅驛曰撐厓柱谷蝮蛇愁入箐

攀天猿掉頭鬼門關外莫言遠五十三驛是皇州
浮雲一百八盤縈落日四十九渡明鬼門關外莫
言遠四海一家皆弟兄自書其後曰古樂府有巴
東三峽巫峽長猿鳴三聲淚沾裳但以抑怨之音
和為數疊惜其聲今不傳余自荊州峽入黔中備
嘗山川險阻因作三疊傳與巴娘令以竹枝歌之
前一疊可和云鬼門關外莫言遠五十三驛是皇
州後一疊可和云鬼門關外莫言遠四海一家皆
弟兄或用四句入陽關小秦王亦可歌也是夜宿
於驛夢李白相見於山間曰予往謫夜郎於此聞
杜鵑作竹枝詞三疊世傳之不予細憶集中無有
三誦而使之傳焉其詞曰一聲望帝花片飛萬里
明妃雪打圍馬上行人那解聽琵琶應道不如歸
竹竿坡面蛇倒退摩圍山腰猢猻愁杜鵑無血可
續淚何日金
鷄赦九州

涪翁過瀘南瀘帥留府會有官妓盼盼帥嘗寵之
涪翁贈浣沙溪詞曰脚上鞦兒四寸羅唇邊朱麝
一櫻多見人無語但迴波料得有心憐宋玉祇因
無奈楚襄何今生有分向伊麼盼盼拜謝涪翁瀘
帥令唱詞侑觴唱惜春
容涪翁大喜醉飲而別

陸放翁之蜀宿一驛中見題壁云玉階蟋蟀聞清
夜金井梧桐辭故枝一枕淒涼眠不得呼燈起作
感秋詩放翁詢之驛卒女也遂納為妾方餘半歲
夫人逐之妾賦卜算子云只知眉上愁不識愁來
路窗外有芭蕉陣陣黃昏雨曉起理殘粧
整頓教愁去不合畫春山依舊畱愁住

放翁在蜀日有所盼嘗賦詩云碧玉當年未破瓜
學成歌舞入侯家如今顚顚蓬窗底飛上青天桐
落花出蜀後每懷舊游多見之賦詠有云金鞭朱
彈憶春游萬里橋東罨畫樓夢情晚風吹不斷書

憑春雁寄無由鏡中顏髮今如此席上賓朋好在
不慳有吳牋三百箇擬將細事寫春愁又云裘馬
清狂錦水濱最繁華地作閒人金壺投箭消長日
翠袖傳杯領好春幽鳥語隨歌處拍落花鋪作舞
時茵悠然自適君知否身與浮名孰是親又以此
詩藥括作風入松云十年裘馬錦江濱酒隱紅塵
黃金選勝鶯花海倚疎狂驅使青春吹笛魚龍盡
出題詩風月俱新自憐華髮滿紗巾猶是官身鳳
樓曾記當年語問浮名何似身親
欲寫吳牋說與這回真箇閒人

韓駒詩題云僊泉虞童子郎使者聞諸朝三年不
加攷故作二絕以贈之歸七歲瀾翻數萬言饑鷹
引子望騰騫時人不識甘羅輩寂寞題詩歸故園
又不作西京童子郎時人何事識黃香還家再誦
五千卷十八重來謁太常按此即漢時童子郎明
初嘗有此選蜀中相傳成弘間新都楊文忠亦在

選列

唐子西嘗見桃李盛開而梅尚存數枝因作詩時
張無盡天覺被召乃以詩投之云桃花能紅李能
白春來何處無顏色不應尚有一枝梅可是東君
苦畱客向來開處當嚴冬桃李未在交游中只今
已是丈夫行勿與少年
爭春風無盡大加稱賞

李燾過成都淨名院曰觸目都似曾到問訊乃非
也其自題龍鵠山房詩云已作清時鳥亂飛杜鵑
更勸阿誰歸似嫌佳處猶城郭不
解攜家隱翠微極有風韻可想

謝慧卿巴謝氏女也頗能詩雖不盡合亦一方之
秀有竊僂自樂詩云尋得桃源可悟僂丹書惟恐
鳳飛傳雨收峯頂雲歸洞風到池塘月
滿天清脫可喜有閨餘集題咏甚富

成都女郎張窈窕上任事者詩云昨日買衣裳今日賣衣裳衣裳都賣盡羞見嫁時廂有賣愁應緩無時心轉傷故園戎馬隔何處是蠶桑

閬中壽聖院僧冲古者工於詩其輓光獻太后云昔補一天成大業晚扶雙日耀重離有詩三百餘篇題白錦屏集又僧惟聰能詩曾賦春陰云好花分日少閒草占春多亦佳句也冲古眉陽人

蜀僧號我眉道者戒律甚嚴不下山二十年一日有布衣青裘昂然一偉人來與語良久期以明年是日復相見於此願少見待明年是日方午道者沐浴端坐而逝至暮偉人果來問道者安在曰亡矣偉人歎息良久書數語堂側壁間絕高處語云落日斜西風冷幽人今夜來不來教人立盡梧桐影字畫飛動如翔鸞舞鳳鳳非世間筆也或云呂洞賓作

蜀僧希晝游雁蕩山云天長來月正木末渡猿稀
答黃桂州云來書逢歲嗣去夢歷峯危送廣漕云
春生桂嶺外人在海門西送僧歸東云帆影先寒
雁經聲隱慕潮送承旨林亭云雪溜垂危石棋燈
射遠林贈僧云漱齒冰溪遠聞蟬雲屋深送人云
玉繩天闕近金柝海城秋贈勾學士云曉天金馬
路晚歲石霜心寄人云山日秋光短江虹晚影低
送新津尉云劍月啼猿苦江沙濯錦寒北宮書亭
云花露盈蟲穴梁塵墮燕泥贈關上人云寄禪關
樹老乞食塞城荒送僧歸云風泉舊聽僧甯改雲
火曾行鳥徑殘春山云芳樹侵雲老孤泉落石
危送人歸南海云落日橫秋島寒濤兀夜船
漢州崇聖寺寒食日忽有朱衣一人紫衣一人氣
貌甚偉驅殿僕馬極盛寺僧謂州官至奔出迎接
皆非也與僧揖甚恭惟少言語命筆各題一絕句
於壁朱衣詩曰禁烟佳節同游此正值茶蘼夾岸

香緬想十年前往事強吟風景亂愁腸紫衣詩曰
策馬暫尋原上路落花芳草尚依然家亡國破一
場夢惆悵又逢寒食天題罷上馬疾去出松徑
失其所在但有異香經月不散其詩於今見在
李太白詩風吹柳滿店春溫庭筠詠柳詩香隨靜
婉歌塵起影伴嬌嬈舞袖垂傳奇詩莫唱踏春陽
令人離腸結郎行久不歸柳自飄香雪
其實柳花亦有微香詩人之言非誣也

瓦屋山徐淵絕句瓦屋山高雲際來飛巒疊嶂
九霄摧興來獨立金剛石雪海孤松翠作堆

楊靜綿竹縣治詩通衢砌石蘚生鱗三兩人家屋
宇新巖子有祠存古里魏公無第與比鄰傳訛但
說千年樹問話那逢百歲人回首
向來佳麗地暮雲斜日紫巖春

眉州孟拾遺祠二絕句一章何罪死何名千載惟
君與屈平從此蜀江烟雨夜杜鵑應作兩般聲

裴

澈翠蓋西蒙駱谷塵尚從奄倭分亡身拾遺竟入玻璃水猶勝汙泥白馬津

紹芳

羅洪載城居憶山四首一日到城郭滿目是飛埃憶我紫山好拂衣歸去來城中豈不佳華屋鱗參差不奈人語喧夢我山與溪溪山素所有新結讀書廬白雲時往來碧樹相蔽虧農夫抱膝嘯村婦餉耕歸鳴鳥在茂樹吠大迎柴扉

綿令張文奎前溪庵絕句一綫流泉注石缸籬門穿樹不須窗山僧那識王喬令怪見飛鳧落一雙玉壺攜上翠微岑我卧苔茵君自吟別有一般清賞處溪山雲月幾知音

孟蜀武德軍節度判官歐陽炯撰花間集序云鏤玉雕瓊擬化工而迴巧栽花剪葉奪春艷以爭鮮是以唱雲謠則金鈿詞清挹霞醴則穆王心醉名高白雪聲聲而自合驚歌響遏青雲字字而偏諧

鳳律楊柳大隄之句樂府相傳芙蓉曲渚之篇豪
家自製莫不爭高門下三千玳瑁之簪競富樽前
數十珊瑚之樹則有綺筵公子繡幌佳人遞葉葉
之花牋文抽麗錦舉纖纖之玉指拍按香檀不無
清絕之辭用助嬌嬈之態自南朝之宮體扇北里
之倡風何止言之不文所謂秀而不實有唐已降
率土之濱家家之香徑春風寧尋越艷處處之紅
樓夜月自鎖嫦娥在明皇朝則有李太白應制清
平樂詞四首近代溫飛卿復有金筌集邇來作者
無愧前人今衛尉少卿字弘基以拾翠洲邇自得
羽毛之異織綃泉底獨殊機杼之功廣會衆賓時
延佳論因集近來詩客曲子詞五百首分為十卷
以炯粗預知音辱請命題仍為序引昔郢人有歌
陽春者號為絕唱乃命之為花間集庶以陽春之
甲將使西園英哲用資羽翼蓋之歡南國嬋娟休
唱蓮舟之引時大蜀廣政三年夏四月日序

司馬相如有封禪詩四篇其一曰自我天覆雲之
油油甘露時雨厥壤可游滋液滲漉何生不育嘉
穀六穗我穡曷蓄非惟雨之又潤澤之非惟徧之
我祀布護之萬物熙熙懷而慕思名山顯位望君
之來居乎君乎侯不邁哉其二曰般般之獸樂我
君囿白質黑章其儀可嘉收收穆穆君子之態蓋
聞其聲今親其來厥塗靡從天瑞之徵茲亦於舜
虞氏以興其三曰濯濯之麟游彼靈時孟冬十月
君徂郊祀馳我君與帝用享祉三代之前蓋未嘗
有其四曰宛宛黃龍興德而升采色炫耀煥炳輝
煌正陽顯見覺悟黎蒸於傳載之云受命所
乘厥之有章不必諄諄依類託寓喻以封巒
秦宓遠遊詩曰遠遊何所見所見選難紀巖穴非
我隣林麓無知己虎則豹之兄鷹則鷁之弟困獸
走環岡飛鳥驚巢起猛氣何咆厲陰
風起千里遠遊長太息太息遠遊子

王褒贈周處士詩我行無歲月征馬屢盤桓峭曲
三危阻關重九折難猶持漢使節尚服楚臣冠巢
禽疑上幕驚羽畏虛彈飛蓬去不已客思漸無端
壯志與時歇生年隨事闌百齡悲促命數客念餘
歡雲生隴城黑桑疎薊北寒鳥道無蹊徑
清溪有波瀾思君化羽翮要我鑄金丹

梁蕭摛和武陵王遙望道館詩神境留精闕仙居
紫翠房今有尋真地迤邐麗通莊九桂含虬重三
臺飾夜光金輝碧海桃玉笈紫書方拂筵青鳥集
吹簫白鳳翔履存堪是燕石在詎非羊烟霞四照
蕊風月五名香於茲
喜臨眺願得假霓裳

宋慕容百才大劍山排律李勢非嶠虎公孫是井
蛙聖朝無外戶夷壤盡為家壘嶂寧須鏟停鼓久
廢撾原鱗生駱谷釣駟入彭衙關失千年壯方來
萬里遐商淵盈瀕洞使節偏捨鈇岑蔚誰驚鳥豐

菱自樂嘉峰屯開雨雪樵爨老烟霞帝德朝宗地
僊遊上漢槎賞奇酬酒興摘藻謝詩葩階走楓林
葉窗摧拍竹花山亭
無刻漏隱几待鳴鴉

何景南遊資縣東巖詩人事何時休紛來如野馬
相攜解鑣處去約岩之下清涼二城雨況值禳禱
罷白雲醉堪眠青草春可藉泉甘嗽蘓醒樹好雷
閒暇頻遊我嘗慣忽至公成乍徘徊共幽興靜坐
絺衣掛中間五百士閱世知幾夏莓苔自成
古香火仍同社巖縫更依然莫問豐下話

李應元登雅州蒙山詩振衣萬仞岡頭路蒙頂蒼
蒼倚大羅欲向雲邊看五岳先從天際揖三峩上
清風冷開元室甘露泉空照碧蘿莫
謂天台迷舊處青鞋綠杖擬重過

劉大謨遊資縣重龍山詩何年卓錫倚層空樓閣
遙聯紫極宮曦駕遠馳青海外人家羅列翠烟中

虛堂縹緲高僧定小徑微茫下界通
盡日徘徊渾不厭虬松鳳竹靄蔥蘢

龍昌期三山即事百貨隨潮船入市萬家沽酒
市垂帘蒼烟卷陌青榕老白露園林紫蔗甜

宋京遊資縣北巖賓州城郭雲山裏北巖正在雲
山底翠壁嵌空抱月明飛閣橫斜矗天起遊人祇

解看城郭不知山底幽人樂六月全無暑氣生三
春亦有林花落蒼桷卧月影如輪乳泉濺電波生

鱗利名付與百忙者早晚自由無事身紅蓮幕下
青城客五斗畱人歸未得衙回不用展山圖直到

岩邊看
秋色

開縣有唐張籍梅溪絕句自愛青梅好
行尋一徑斜不教人掃石恐損落來花

宋喻汝礪雲安下岩次涪翁四首徑向山腰轉門
從水面開片雲岩下宿一鉢朔方來落日鳥衝樹

輕陰花覆苔惟應荔枝熟時攝白雲迴路暗松杉
密天空霧雨開山容依檻轉鳥影渡江來汲水僧
歸寺銜花鹿印苔年年蠶麥熟貧道餽齋來我來
二月初蒨子花未開僧云此果熟日日公入來自
從劉使君樹下生莓苔久欲斫此樹為公且遲迴
劉郎年三十見事心孔開雲安十二鄉麥炒相往
來市欄足乾柿印窠生綠苔

明年當替去誰挽馬頭迴

夾江宿進青溪漁隱詩磷磷溪頭水盤盤雲裏松
有水須畱月有松須乘風乘風氣清爽畱月光
璫溪水流不去松濤常鏤鏤此境不易得懷哉漁
隱翁馮江排律云天地張機軸陰陽散縝紛鳳梭
流日月龍轂捲霞雲織玄無庸巧天工豈在勤源
頭飛素練流處洩元纁天濶江牽線風清浪皺文
花飛明濯錦烟裊暗藏雲誰把并州剪今裁阿錫
文峽門疑是東江閣若為緡吞日顏紅見臨崖綷

繚聞荇鋪青作襖苔襯綠成
席伯禹殊縫補元明亦煥所

內江劉五清配汪藻之女有寄五清詩旅食京華
歲月多聖賢事業竟如何明年佇聽泥金報聞把
關雎獨自歌燈夕詩萬里玲瓏漾水晶滿城春色
勝蓬瀛君王願坐光明景四海蒼生歌太平趙文
肅李夫人舟中詩河水急於箭仙槎去若飛家人
應羨我遙自斗邊歸眉州鄧氏適叙州戶部郎金
寬亦有寄寬詩鎮日多愁屢廢食閉門清坐遣應
難庭前別我春猶在月下懷君秋已殘幾點落花
誰著眼一聲飛雁獨凭欄夢回
湘簟無消息更啟前書仔細看

成都神鳳儀字子韶少工文流連女色老成勢朽
生子俱不全然亦以壽終人謂之異數云客有誦
其詠蚊蟲辭云兩翅輕盈楚腰纖細鏗鏗一派笙
歌沸黃昏人未掩柴扉潛身悄入羅幃裏侵憐玉

體挨傍香肌嘴痕到處臙脂寄耳邊做就
百般聲夜深不肯教人眠詞義極工緻
天地正大之氣隨物賦予無處無之故松柏鴻鴈
猶完貞介況含靈翕粹號為人者哉嘉靖丙午歲
川中大饑川北猶甚有成都一丞使自北來過保
寧道遇一夫婦餒困待盡者以餅餌之稍稍能起
其夫曰願鬻婦以兩全其生婦亦佯許之丞使頗
悅其姿遂解所攜米肉之類給之挈婦去泣別其
夫行數里許即投身岩下死丞使懊悔
駭愕遂策馬亟去歸語親黨如此云
張桺漢前將軍關公廟議云今天下事將軍者極
天下之媚矣咸諫刀馬譽色鬚不則列之異端之
側駕諸三界之上或又旒冠赭衣過為儀仗而嚶
咕家又以道脈心傳強蒙之而將軍無如何夫將
軍漢人也遇昭烈定布衣交與南陽孔明泳鹿翼
德出死力以爭漢鼎危亦屢矣而卒成其志所謂

久要不忘事君致身者真其人也當時多讀書能
文章如荀彧孔融皆為曹操釣取魚肉之獨公委
曲從容以成其節則凡奸宄狐鼠思輸資拜謁以
求庇佑豈不謬哉至列為伽藍者吾不悉其何說
第思將軍忠義之人於佛氏無父無君自應羞為
而謂甘心下之必不然矣明神宗棄人事而重神
道濫加封號蓋桓靈後身也夫桓靈昭烈之所恨
而將軍肯受其賜乎據漢書將軍好讀左氏春秋
獨不喜士大夫蓋摘句尋章不識有漢安足當其
一盼耶然則何以事將軍哉為臣思忠結友思義
以隻雞甌醪置將軍
木主前則得之矣

譜

宋王宗稷蘇東坡年譜

節錄 仁宗景祐三年丙子
十二月十九日乙卯時先生

生實仁宗即位之十一年按先生送沈遠詩曰嗟
我與君皆丙子又按玉局文云十二月十九日東
坡生日置酒赤壁磯上又按志林云退之以磨蝎
為身宮而僕以磨蝎為命宮若以磨蝎為命推之
則為卯時生議者以先生十二月為辛丑月十九
日為癸亥日丙子癸亥水向東流故才氣汗漫而
澄清子卯相刑晚年多難又志林云韓退之詩我
生之辰月宿南斗乃知退之以磨蝎為身宮僕以
磨蝎為命宮平生多得謗譽殆同病也慶歷二
年壬午先生七歲知讀書三年癸未先生八歲
入小學按先生作范文正公文集序云慶歷三年
某始入鄉校士有自京師來以魯人石守道慶歷
聖德詩示鄉先生某從旁竊觀問先生十一人何
人也先生曰童子何用知之某曰此天人也耶則
不敢知若亦人耳何為其不可五年乙酉先生
年十歲按子由作先生墓誌云公生十年而先君

宜學四方太夫人親授以書問古今成敗輒能語其要太夫人讀東漢史至范滂傳慨然太息公侍側曰某若為滂夫人亦許之否乎夫人曰汝能為滂吾顧不能為滂母耶又按大全集載東坡少時語云秦少章言東坡十來歲老蘇令作夏侯太初論有人能碎千金之璧不能無失聲於破釜能搏猛虎不能無變色於蜂蟻之語又按趙德麟所編侯鯖錄云東坡年十歲見老蘇誦歐公謝宣召赴學士院仍謝賜對衣金帶及馬表老蘇令坡擬之其間有匪伊垂之而帶有餘非敢後也而馬不進老蘇喜曰此子他日當自用之至和元年甲午先生年十九始娶眉山青神王方女按先生作王氏墓誌云生十有六歲而歸于某至治平二年而王氏卒二年乙未先生年二十遊成都謁張安道按先生作樂全先生文集序云某年二十以諸生見公成都一見待以國士有鼂美叔是年求交

先生按送美叔詩云我生二十無朋儔當時四海
一子由君來叩門若有求嘉祐元年丙申先生
年二十一舉進士二年丁酉先生年二十二赴
試禮部按先生作興國六祖畫贊云余嘉祐初舉
進士館於興國寺浴堂院時歐陽文忠公考試得
先生刑賞忠厚之至論以為異人欲冠多士疑曾
子固所為子固文忠門下士也乃真第二復以春
秋對義居第一及殿試章衡榜中進士乙科始見
知於歐陽公又按先生作太息一篇送秦少章歸
京云昔吾舉進士試名於禮部歐陽文忠公見吾
丈且曰此我輩人也吾當避之是年四月丁太夫
人武陽君程氏憂按司馬溫公作程夫人墓誌云
夫人以嘉祐二年四月癸丑終於鄉里四年已
亥先生年二十四服除十二月侍老蘇舟行適楚
按先生南行前集序云已亥之歲侍行適楚舟中
無事雜然有觸於中而發於咏嘆蓋家君之作與

弟轍之文皆在焉謂之南行集 五年庚子先生
年二十五授河南府福昌縣主簿 六年辛丑先
生年二十六應中制科入第三等有應制科上兩
制書及上富丞相書又有謝應中制科啟授大理
評事鳳翔府僉判按先生有感舊詩序云嘉祐中
予與子由奉制策寓居懷遠驛時年二十六子由
年二十三 是年十二月赴鳳翔任與子由別 七
年壬寅先生年二十七官於鳳翔二月有詔郡吏
分往屬縣決囚作詩五百言寄子由 八年癸卯
先生年二十八官於鳳翔作思治論 英宗治平
元年甲辰先生年二十九官於鳳翔 二年乙巳
先生年三十自鳳翔罷任按子由作先生墓誌銘
云治平二年罷還判登聞鼓院英宗在藩邸聞先
生名欲以唐故事召入翰林宰相限以近例召試
祕閣皆入三等得直史館是年通義郡君王氏卒
於京師 三年丙午先生年三十一在京師直史

館丁父憂扶護歸蜀按歐陽文忠公作明允墓誌云明允太常因革禮書一百卷書成方奏未報而卒英宗聞而傷之命有司具舟載其喪歸葬於蜀四年丁未先生年三十二居服制中以八月壬辰葬老泉於眉州神宗熙寧元年戊申先生年三十三免喪二年己酉先生年三十四還朝監官告院三年庚戌先生年三十五監官告院是年范景仁嘗舉先生克諫官四年辛亥先生年三十六任監官告院兼判尚書祠部王荊公欲變科舉上使兩制三館議之先生獻三言荊公之黨不悅命攝開封府推官有奏罷買燈疏御史知雜事誣奏先生過失先生不辭乞外任避之除通判杭州五年壬子先生年三十七在杭州是歲有牡丹記其序云熙寧五年三月二十三日余從太守沈公觀花於吉祥寺是年科場先生監試八月十七日登望湖樓是日榜出有送杭州進士詩序

云熙寧五年錢塘之士貢於禮部者九人十月乙酉宴於中和堂作是詩以勉之十二日運司差先生往湖州相度隄埧利害與湖州太守孫莘老相見有贈莘老七絕六年癸丑先生年三十八在杭州有八月十五觀湖詩寫於安濟亭上及作仁宗飛白記其略云熙寧六年冬以事至姑蘇安簡王公子誨出所賜公端敏二字又有作錢塘六井記其略云熙寧五年太守陳公述古至問民之利病明年春六井畢修故詳其語以告後人運司又差先生往潤州七年甲寅先生年三十九在杭州以子由在濟南求為東州守按子由超然臺賦序云子瞻通守餘杭三年不得代以轍之在濟南也求為東州守既得請高密五月乃有移知密州之命則通判杭已四載矣八年乙卯先生年四十到密州任有上韓丞相論災傷書到任二十餘日又論密州鹽稅九年丙辰先生年四十一在

密州任 十年丁巳先生年四十二在密州任就
差知河中府已而改知徐州四月赴徐州任徐州
水患大作七月十七日河決澶州曹邨八月二十
一日及徐州城下先生治水有功至十月五日水
漸退城以全朝廷降詔獎諭作河復詩 元豐元
年戊午先生年四十三在徐州任適值春旱徐州
城東二十里有石潭置虎頭其中可致雷雨作起
伏龍行二月有旨賜錢二十四百一十萬起夫四
千二百三人及發常平錢米改築徐州外小城創
木岸四以獎諭勅記併刻諸石為熙寧防河錄云
廼即徐州城之東門為大樓壘以黃土名之曰黃
樓以土實勝水故也 二年己未先生年四十四
在徐州任三月自徐州移知湖州按先生作張氏
園亭記云余自彭城移守吳興由宋登舟三宿而
至是年四月二十九日到湖州任王子立子敏皆
從先生作子立墓誌云子立子敏皆從余學於吳

興學道日進東南之士稱之是歲言事者以先生
湖州到任謝表以為謗七月二十八日中使皇甫
遵到湖州追攝按先生上文潞公書云某始就建
赴獄有一子稍長徒步相隨其餘守舍皆婦女幼
稚至宿州御史符下就家取書州郡望風遣吏發
卒圍船搜取長幼幾怖死既去婦女恚罵曰是好
著書書成何所得而怖我如此悉取焚之十二月
二十日聞太皇太后升遐吏以某罪人不許成服
欲哭則不可欲泣則不敢作挽詩二首已而獄具
十二月二十九日責授黃州團練副使本州安置
是年子由聞先生下獄上書乞以見任官職贖先
生罪謫筠州酒官出獄再次寄子由二詩韻有百
日歸期恰及春之句先生自八月下獄至是踰百
日矣三年庚申先生年四十五謫黃州自京師
道出陳州子由自南郡來陳相見三日而別乃正
月十四日也以二月一日至黃州寓居定惠院按

近日黃州東坡圖云先生寓居定惠未久以是年遷臨臯亭先生復就臨臯亭立南堂至八月先生乳母任氏卒於臨臯亭葬於黃岡按先生上文潞公書云到黃州無所用心覃思易論語若有所得由是言之先生到黃定居之後即作易傳九卷論語五卷矣四年辛酉先生年四十六在黃州居臨臯亭五年壬戌先生年四十七在黃州寓居臨臯亭就東坡築雪堂號東坡居士六年癸亥先生年四十八在黃州七年甲子先生年四十九在黃州四月乃有量移汝州之命則先生居黃五載矣八年乙丑先生年五十按大全集雜說驪駒驛試筆云今日離泗州然吾方上書求居常州及到南京有放歸陽羨之命遂居常五月內復朝奉郎知登州再過密州到郡五日以禮部郎召到省半月除起居舍人哲宗元祐元年丙寅先生年五十一以七品服入侍延和改賜銀緋尋除

中書舍人按志林云元祐元年余為中書舍人復遷翰林學士知制誥任中書舍人日舉江寧府司理周種充學官及除內翰又有舉魯直自代狀二年丁卯先生年五十二為翰林學士復除侍讀三年戊辰先生年五十三任翰林學士有和子由元日省宿致齋有白髮蒼顏五十三之句是年省試先生知貢舉開院日有與李方叔詩序云僕與李鴈方叔相知久矣僕領貢舉事李不得第愧甚作詩謝之又充館伴北使按先生與陳傳道書云某頃伴虜使頗能誦某文四年己巳先生年五十四任翰林學士三月內累章請郡除龍圖閣學士知杭州按子由作先生墓誌云宣仁心善先生辭蔡持正之謗出郊遣內侍賜龍茶銀合用前執政恩例先生以七月三日到杭州任謝表云江山故國所至如歸父老遺民與臣相問到任有謁文宣王廟祝文云昔自太史通守是邦今由某林

出使浙右又有謁諸廟祝文五年庚午先生年五十五在杭州任有論西湖狀及論高麗公案六年辛未先生年五十六在杭州被召則在杭州不過二載也既到京師除翰林承旨復侍邇英按子由所作穎濱遺老傳云先生召還本除吏部尚書復以臣故改翰林承旨臣之私意原不遑安乞寢臣新命與兄同脩從官不報俟鯖錄云先生元祐中再召入院作承旨乃益舊擬作衣帶馬表云祐羸之質匪伊垂之而帶有餘斂退之心非敢後也而馬不進數月以弟嫌請郡復以舊職知潁州按先生懷舊別子由詩云元祐六年予自杭州召還寓居子由東府數月復出領汝陰時予年五十六矣有到潁未幾公帑已竭齋廚索然戲作數句俟鯖錄云元祐六年冬汝陰久雪人饑一日天未明先生簡召議事曰某一夕不寐念潁人之饑欲出百餘金造炊餅救之老妻謂某曰子昨過陳見傳

欽之言僉判在陳賑濟有功盡問其賑濟之法某遂相招令時而議曰已備矣今細民之困不過食與火耳義倉之積穀數千石便可支散以救下民作院有炭數萬秤酒務有柴數十萬秤依元價賣之可濟衆民先生曰吾事濟矣遂草放積欠賑濟奏又奏乞罷黃河夫萬人開本州溝瀆從之七年壬申先生年五十七在潁州任已而改知揚州先生之在潁也與趙德麟同治西湖未幾有維揚之命三月十六日湖成德麟有詩見懷先生次韻又再和之已而以兵部尚書召復兼侍讀是年南郊先生為鹵簿使尋遷禮部尚書遷端明侍讀學士有讀朱暉傳題文潛語後及作醉翁操任兵部尚書日有薦趙德麟狀八年癸酉先生年五十八任端明侍讀二學士是年先生繼室同安郡君王氏卒於京師按先生作西方阿彌陀贊序云蘇某之妻王氏元祐八年八月一日卒於京師謹按

先生初娶通義郡君王氏乃同安之堂姊也先生
祭王君錫夫人云某始婚姻公之猶子允有令德
天閼莫遂惟公幼女嗣執蠶籠由是推之通義為
同安之堂姊明矣又有八月二十七日建隆章淨
館成一絕有坐待官人畫詔回之句復以二學士
出知定州九月十四日東府雨中作示子由云去
年秋雨時我在廣陵歸今年中山去白首歸無期
蓋定州之除在九月內到定州任則有祭韓魏公
文 紹聖元年甲戌先生年五十九知定州就任
落兩職追一官知英州有辭宣聖文行至南康軍
再貶寧遠軍節度副使惠州安置過虔州是年十
月三日到惠州寓居嘉祐寺 二年乙亥先生年
六十在惠州是年遷居於合江亭 三年丙子先
生年六十一在惠州有和陶淵明移居詩云余去
歲三月自水東嘉祐寺遷去合江樓迨今一年得
歸善後隙地數畝父老云古白鶴觀基也意欣然

居之營自鶴新居始於是矣當年惠州修東西新橋先生助以屏帶而子由亦以史夫人頃入內所賜金錢數千為助及橋成日先生有詩落之四年丁丑先生年六十二在惠州五月先生摘授瓊州別駕昌化軍安置則五十九歲惠州客至是六十二歲又過海也按志林云余在惠州忽被命謫儋耳太守方子容自攜告身來弔余曰此故前定吾妻沈市僧伽甚誠一夕夢和尚來辭云當與蘇子瞻同行後七十二日有命今適七十二日矣豈非前定乎遂寄家惠州獨與幼子過渡海到儋州有儋州謝表按子由作先生墓誌云紹聖四年先生安置昌化初僦官屋以庇風雨有司猶謂不可則買地築室昌化士人畚土運甕以助之為屋三間元符元年戊寅先生年六十三在儋州二年己卯先生年六十四在儋州三年庚辰先生年六十五在儋州五月大赦量移廣州安置先生

在僮食芋飲水作書傳以推明上古之絕學六月
過瓊州作惠通泉記遂渡海是歲又有移永州之
命按先生謝提舉成都府玉局觀表云先自昌化
貶所移廣州又自康州移舒州節度副使永州居
住行至英州復朝奉郎提舉成都府玉局觀任使
居住經由廣州有將至廣州用過字韻寄迨邁二
子詩蓋先生甲戌謫惠州已而過海至是為七年
矣次年正月五日過南安軍計先生度嶺必是歲
除建中靖國元年卒已先生年六十六度嶺北
歸作南華長老題名記正月到虔州有與錢濟明
書云某已到虔州二月十間方離此及發虔州過
吉州永和鎮清都觀有謝道士自言丙子生求詩
為賦一首及作贊并寫清都臺三字中途又為南
安軍作學記寫海外所作天慶觀乳泉賦四月舟
行至豫章彭蠡之間遇成國程夫人忌日迺寫國
通偈云行當施廬山有道者又有與胡仁修書云

旦夕道儀真暫令邁一至常五月行至真州瘴毒大作病暴下中止於常州六月上表請老以本官致仕七月丁亥卒於常州實七月二十八日也是為徽宗登極之元年辛巳云按子由作先生墓誌云先生七月被病卒於毘陵吳趙之民相與哭於野其君子相與弔於家計聞於四方無賢愚皆咨嗟出涕太學之士數百人相率飯僧惠林佛舍嗚呼先生文章為百世之師而忠義尤為天下大開加之好賢樂善常若不及是宜計聞之日士民惜哲人之萎朝野嗟一鑑之逝皆出於自然不可強而致也以次年閏六月葬於汝州郟城縣釣臺鄉上瑞里

陸游天彭牡丹譜

牡丹在中州洛陽為第一在蜀天彭為第一天彭之花皆不詳

其所自出上人云曩時永寧院有僧種花最盛俗謂之牡丹院春時賞花者多集於此其後花稍衰

人亦不復至崇寧中州民宋氏張氏蔡氏宣和
石子灘楊氏皆嘗買洛中新花以歸自是洛花散
於人間花戶始盛皆以接花為業大家好事者皆
竭其力以養花而天彭之花遂冠兩川今惟三井
李氏劉邨母氏城中蘇氏城西李氏花特盛又有
餘力治亭館以故最得名至花戶連畛相望莫得
其姓氏也天彭三邑皆有花惟城西沙橋上下花
尤超絕由沙橋至壩口崇寧之間亦多佳品自城
東抵濛陽則絕少矣大抵花品近百種然著者不
過四十而紅花最多紫花黃花各不過數品碧花
一二而已今自狀元紅至歐碧以類次第
之所未詳者姑列其名於後以待好事者

花釋名

洛花見紀於歐陽公者天彭往往有之此
不載載其著於天彭者彭人謂花之多葉

者京花單葉者川花近歲尤賤川花賣不復售花
之舊載曰祖花其新接頭有一春兩春者花少而

富至三春則花稍多及成樹花雖益繁而花葉減矣狀元紅者重葉深紅花其色與輕紅潛緋相類而天姿富貴彭人以冠花品多葉者謂之第一架葉少而色稍淺者謂之第二架以其高出衆花之上故名狀元紅或曰舊制進士第一人即賜萬袍此花如其色故以名之祥雲者千葉淺紅花妖艷多態而花葉最多花戶王氏謂此花如朶雲狀故謂之祥雲紹興春者祥雲子花也色淡佇而花尤富大者徑尺紹興中始傳大抵花戶多種花子以觀其變不獨祥雲耳臙脂樓者深淺相間如臙脂染成重趺朶狀如樓觀色淺者出於新繁勾氏色深者出於花戶宋氏又有一種色稍下獨勾氏花為冠金腰樓玉腰樓皆粉紅花而起樓子黃白間開如金玉色與臙脂樓同類雙頭紅者並蒂跗萼色尤鮮明出於花戶宋氏始秘不傳有謝主簿者始得其種今花戶往往有之然養之得地則歲

歲皆雙不爾則間年矣此花之絕異者也富貴紅者其花葉圓正而厚色若新染乾者他花皆落獨此抱枝而槁亦花之異者一尺紅者深紅頗近紫色花面大幾尺故以一尺名之鹿胎紅者鶴頂紅子花色紅微帶黃上有白點如鹿胎極化工之妙歐陽公花品有鹿胎花者乃紫花與此頗異文公紅者出於西京潞公園亦花之麗者其種傳蜀中遂以文公名之政和春者淺粉紅花有綠頭政和中始出醉西施者粉白花中間紅暈狀如酡顏迎日紅與醉西施同類淺紅花中特出深紅花開最早而妖麗奪目故以迎日名之彩霞者其色光麗爛然如霞疊羅者中間瑣碎如疊羅文勝疊羅者差大於疊羅此三品皆以形而名之瑞露蟬亦粉紅花中抽碧心如合蟬狀乾花者紅粉花而分蟬旋轉其花有大千葉小千葉皆粉紅花之傑者大千葉無碎花小千葉則花萼瑣碎故以大小別之

此二十一品皆紅花之著者也紫繡毬一名新紫花蓋魏花之別品也其花圓正如繡毬狀亦有起樓者為天彭紫花之冠乾道紫色稍淡而暈紅出未十年潑墨者新紫花之子花也單葉深黑如墨歐公記有葉底紫近之葛巾紫花圓正而富麗如世人所戴葛巾狀福嚴紫亦重葉紫花其葉少於紫繡毬莫詳所以得名按歐公所紀有玉版白出於福嚴院土人云此花亦自西京來謂之舊紫花豈亦出於福嚴耶禁苑黃蓋姚黃之別品也其花閒淡高秀可亞姚黃慶雲黃花葉重複郁然輪囷以故得名青心黃者其花心正青一本花往往有兩品或正圓如毬或層起成樓子亦異矣黃氣毬者淡黃檀心花葉圓正間背相承敷腴可愛玉樓子者白花起樓高標逸韻自然是風塵外物劉師哥者白花帶微紅多至數百葉纖妍可愛莫知何以得名玉覆盆者一名玉炊餅蓋圓頭白花也碧

花止一品名曰歐碧其花淺碧而開最晚獨出歐氏故以姓著大抵洛中舊品獨以姚魏為冠天彭則紅花以狀元紅為第一紫花以紫繡球為第一黃花以禁苑黃為第一白花以玉樓子為第一然花戶歲益培接新特間出將不特此而已好事者尚屢書之天彭號小西京以其俗好花有京洛之遺風大家至千本花時自太守而下往往即花盛處張飲帝幕車馬歌吹相屬最盛於寒食時在寒食前者謂之火前花其開稍久火後則易落最喜陰晴相半時謂之養花天裁接剔治各有其法謂之弄花有弄花一年看花十日之語故大家例惜花可就觀不敢輕剪蓋剪花則次年花絕少惟花戶則多植花以年利雙頭紅初出時一本花最直至三十千祥雲初出亦直至七八千今尚兩千州家歲常以花餉諸臺及旁郡蠟蒂筠籃旁午于道子客成都六年歲常得餉然率不能絕佳淳熙丁

酉歲成都帥以善價私售於花戶得數百苞馳騎
取之至成都露猶未晞其大徑尺夜宴西樓下燭
焰與花相映影搖酒中繁麗動人嗟乎天彭之花
要不可望洛中而其盛已如此使異時復兩京王
公卿相築園第以相誇尚予幸得以觀焉其動蕩
心目又宜何如也明年正月十日山陰陸游書

胡元質牡丹譜

大中祥符辛亥春府尹任公正宴
客大慈精舍州民王氏獻一合歡

牡丹公即命圖之士庶創觀闌咽終日蜀自李唐
後未有此花凡圖畫者唯名洛陽花偽蜀王氏號
其苑曰宣華權相勳臣親起第宅上下窮極奢麗
皆無牡丹惟徐延瓊聞秦州董成林僧院有牡丹
一株遂厚以金帛歷三千里取至蜀植於新宅至
孟氏於宣華苑廣加栽植名之曰牡丹苑廣政五
年牡丹雙開者十黃者白者三紅白相間者四後
主宴苑中賞之花至盛矣有深紅淺紅深紫淺紫

淡黃鉅黃潔白正暈例暈金含稜銀含稜旁枝副
搏合歡重臺至五十葉面徑七八寸有檀心如墨
者香聞至五十步蜀平花散落民間小東門外有
張百花李百花之號皆培子分根種以求利每一
本獲數萬錢宋景文公祁帥蜀彭州守朱君綽始
取楊氏園花凡十品以獻公在蜀四年每花時按
其名往取彭州送花遂成故事公于十種花尤愛
重錦被堆嘗為之賦蓋他園所無也牡丹之性不
利燥濕彭州丘壤既得燥濕之中又土人種蒔偏
得法花開有至七百葉面可徑尺以上今品類幾
五十種繼又有一種色淡紅枝頭絕大者中書舍
人程公厚倅是州目之為祥雲其花結子可種餘
花多取單葉花本以千葉花接之千葉花來自洛
京土人謂之京花單葉時號川花爾景文所作贊
別為一編其為朱彭州賦牡丹詩有蹄金點鬢密
瑋玉鏤附紅香惜特來遠春應摘後空之句今西

樓花數欄花不甚多而彭州所供率下品范公成大時以錢買之始得名花提刑程公沂預會數曰自離洛陽今始見花爾程公故洛陽人也牡丹坪在灌縣西南八十里大面山自青城巖下捫蘿而上由烏道三十里許乃金華庵前有平阜樹高蔽天花開桃紅色莢葉十四五瓣狀如芙蓉香似牡丹春深花先長後發葉謂之枯枝牡丹譙大授李太素二先生隱居其中范至能有詩十丈牡丹如錦蓋人間姚魏敢爭春世傳謂三十年其花方一開

沈立海棠記序

蜀花稱美者有海棠焉然記牒多所不錄蓋恐近代有之何者古人

獨棄此而取彼耶嘗聞真宗皇帝御製後苑雜花十題以海棠為首章賜近臣唱和則知海棠足與牡丹抗衡而可獨步於西州矣因揆擇前志惟唐相賈元靖耽著百花譜以海棠為花中神仙誠不

虛美耳近世名儒巨賢發于歌咏清辭麗句往往而得至慶歷中為縣洪雅春多暇日地富海棠幸得為東道主惜其繁艷為一隅之滯卉為作海棠記叙其大槩及編次諸公詩句于右復率蕪拙作五言百韻詩一章四韻詩一章附于卷末

海棠記

棠之稱甚衆若詩有蔽芾甘棠又曰有秋之杜爾雅釋木曰杜甘棠也郭璞注今杜

赤棠白者棠又呂氏春秋果之美者棠實又俗說有棣棠棠梨沙棠味如李無核較是數說俱非謂海棠也凡今草木以海為名者西陽雜俎云唐贊皇李德裕嘗言花名中之帶海者悉從海外來故如海梭柳海石榴海木瓜之類俱無聞於記述豈以多而為稱耶又非多也誠恐近代得之於海外耳入杜子美海梭行云欲裁北辰不可得惟有西域僧識之若然則贊皇之言不誣矣海棠雖盛稱

於蜀而蜀人不甚重今京師江淮尤競植之每一
本價不下數十金勝地名園競為佳致而出江南
者復稱之曰南海棠大抵相類而花差小色尤深
耳常性多類梨核生者長遲逮十數年方有花都
下接花工多以嫩枝附梨而贅之則易茂矣種宜
墟壤膏沃之地其根色黃而盤勁其木堅而多節
其外白而中赤其枝柔密而修暢其葉類銀二大
者綠綠色而小者淺紫色其紅花五出初極紅如
胭脂點點然及開則漸成緋暈至落則若宿粧淡
粉矣其蒂長寸餘淡紫於葉間或三萼至五萼為
藥而生其蕊如金粟蕊中有鬚三如紫絲其香清
酷不蘭不麝其實狀如梨大如櫻桃至秋熟可食
其味甘而微酸茲棠之大槩也 海棠有色而無
香惟嘉州色香並勝大足治中舊有香霏閣號曰
海棠香國謂杜子美諱母乳名詩中不之及恐亦
宋人傳會成都有名銀絲海棠樹可尺圍枝幹扶

疎葉與海棠無異花白色若金銀花狀開時清香襲人 醪醑花志載惟成都最佳有三種曰白玉碗曰出爐銀曰雲南紅色香俱美 牡丹諸色俱備千葉而大如毬兩都所不及也一名魚血紅者獨艷 山茶有雲南紅石榴紅謝萬定數種朵大勝芍藥重瓣如芙蓉上人自能接他處所莫匹也素馨紅者白者俱奇品紅開於春白開於秋桂之丹者色亦甲於南中茉莉枝如藤花瓣稍大山蘭四季有花香氣襲人又有一種葉稍大紅黃白三色而窮冬新正盛開名曰蟬花則尤異也

洪邁糖霜譜

糖霜之名唐以前無所見自古食蔗者始為蔗漿宋玉招魂所謂飴蠶魚

羔有蔗漿是也其後為蔗錫孫亮使黃門就中藏更取交州所獻甘蔗錫是也後又為石蜜南中八郡志云榨甘蔗汁曝成飲謂之石蜜本草亦云煉糖和乳為石蜜是也後又為蔗酒唐赤土國用甘

蔗作酒雜以紫瓜根是也唐太宗遣使至摩揭陀國取熬糖法即詔揚州上諸蔗榨瀉如其劑色味愈於西域遠甚然只是今之沙糖蔗之技盡於此不言作霜然則糖霜非古也歷世詩人模奇寫異亦無一章一句言之惟東坡公過金山寺作詩送遂寧僧圓寶云涪江與中冷共此一味水冰盤薦琥珀何似糖霜美黃魯直在我州作頌答梓州雍熙長老寄糖霜云遠寄蔗霜知有味勝於崔子水晶鹽正宗掃地從誰說我舌猶能及鼻尖則遂寧糖霜見於文字者實始二公甘蔗所在皆植獨福唐四明番禺廣漢遂寧有糖水而遂寧為冠四郡所產甚微而顆碎色淺味薄比遂之最下者亦皆起於近世唐大厯中有鄒和尚者始來小溪之織山教民黃氏以造霜之法織山在縣北二十里山前後為蔗田者十之四糖霜戶十之三蔗有四色曰杜蔗曰西蔗曰芳蔗本草所謂荻蔗也曰紅蔗

本草所謂崑崙蔗也紅蔗止堪生噉芳蔗可作沙糖西蔗可作霜色淺土不甚貴杜蔗綠嫩味極厚專用作霜凡蔗最困地力今年為蔗田者明年改種五穀以息之霜戶器用曰蔗削曰蔗錄曰蔗覓曰蔗碾曰榨斗曰榨牀曰漆覓各有制度凡霜一覓中品色亦自不同堆疊如假山者為上團枝次之覓鑑次之大顆塊次之沙腳為下紫為上深琥珀次之淺黃又次之淺白為下宣和初王黼創應奉司遂寧常貢外歲別進數千斤是時所產益奇牆壁或方寸應奉司罷乃不再見當時因之大擾敗本業者居半久而未復遂寧王灼作糖霜譜譜篇俱載其說

元費著氏族譜

前記凡五載人物不載氏族自今記晉常璩嘗記蜀中大姓成都府有柳杜

張趙郭楊朱卽有何羅郭繁有張新都府有楊董沈鄭其它不一著列皆可槩見是數千姓果大曾不

記人物司馬文園遺藁僅得之妻揚子雲有子童
烏能與玄文裁九齡夭然則人物有其傳尤可重
矣記今自人物外載氏族不徒以補前之缺亦以
表宋朝以來世系之盛凡第次以起家後先而見
之今者書其名不
書其事皆法也

吳氏

吳氏入蜀以唐左武衛兵曹參軍為始祖四
世孫蘇偽蜀時最顯至哀六世矣仕宋朝至

太子舍人贈都官員外郎七世孫季良第端拱二
年進士至都官郎中贈中大夫九世諸孫師孟第
進士官至左朝議大夫門望始大王公安石當國
謂師孟同年生也自鳳州別駕擢為梓州路提舉
常平倉兼農田水利差役事師孟疏力言法不便
寧罷歸故官後知蜀州又論茶法害民繼謝事去
蘇文忠公軾刺新法書有曰吳某乞免提舉如逃
垢穢至言茶病民以矯矯六君子稱之師孟其一

也子縝以世科官至左朝議大夫知邛蜀洋萬四
州子景知漢州官至朝散大夫景之子璘始遷蜀
州今崇慶府惟師孟從兄弟師益三世猶居成都
其嘗應賢良科科廢老死布衣族最舊子孫尤蕃
十世皆
葬成都

范氏

范氏自杜溫叔奔晉四世食米於范遂為氏
世遠譜落唐相履冰下十有一世曰隆廣明

間入蜀家成都孫紹溫處唐季歷王孟偽蜀雖不
仕三世已能有立為著姓子曰昌佑有全德二子
曰瑒曰璩瑒贈太保公也太保生三子長曰鑑以進士甲科
度贈太師公也太師生三子長曰鑑以進士甲科
終隴城令次曰錯終衛尉丞贈太尉季子鎮是為
蜀忠文公子孫曾三世登科曰百揆曰祖淳曰塤
塤官至左中大夫歷使蜀移使荆湖北路卒太尉
有子曰百禄位至中書侍郎贈榮國公榮公有從

子曰祖禹位至翰林學士兼侍講有從孫曰冲位至翰林學士曰溫位至明堂班朔郎有曾孫曰仲芭故為右諫議大夫曰仲藝今為中書舍人曰黼前為著作郎兼禮部郎中皆世其官曰仲較曰仲綸曰仲芸以辭章世其門不克顯元孫曰子長曰子垓又世其科子長今為飛鳥宰被命名榮公兄曰百祉不但有如祖禹孫如冲如溫而諸孫曰洄諸曾孫曰仲圭仲及仲循仲徽仲南各以文學行義政事名四世諸孫謨故國子監丞孫嘗位於朝今知邛州榮公之仲兄曰百朋有子曰祖睿諸孫曰游諸曾孫曰仲愷仲俛獨不第三子後先登科曰子修子奕子庚典州除節矣翁無恙稠人中莫覺有貴子賢德蓋相襲也父子兄弟登科至聯四世諸子登科世掌絲綸人共推范氏

郭氏

郭氏自及為廣都令家焉其自叙系出子儀子儀六世孫甫為御史中丞從僖宗幸蜀及

其弟也故中丞死因以葬廣都石子山及三孫曰全介鈴全之孫震以詩名號漁舟先生李旼序其詩淳化四年先生詣闕上書言蜀將有變未幾順賊作亂先生留中原不歸無子皆旼云鈴諸孫早著鈴生貞時孟氏納土朝廷謂西州豪右可任罷檄補貞吏貞稱疾不就子仁渥當順賊亂卒黨保別墅獲免均賊繼起道遇害贈職方員外郎二子軫輔軫子子定子安皆以賞以恩得官孫衢亨登崇寧上第終宣教郎曾孫南義以詩名終於布衣輔起家登天聖乙科范公仲淹龐公籍韓公琦皆表其丰器可任自鳳州擢知興元平均房叛卒璽書褒美繼二持節後以梓州轉運使皇祐二年平清井夷死賞延三子中子子臯最知名子臯知大邑均三邑灌既人號為平歷知昌劍利三州子璠瑜皆以賞得官瑜獨顯嘗提學京東後知懷州諸孫曰眉壽曰暘諸孫曰儼曰偉曰俟曰儼曰傑

眉壽侯億皆登第餘以世賞或以舉恩惟傑在介
諸孫麟輯輕軾麟生由儀登慶厯第終南浦令由
儀生忱登元豐第以博學名通判恭州年五十會
蔡京用事忽忽不樂丐祠遂老生時敏終通直郎
時敏生晞嘗為大金留豫司幹辦公事受金人所
歸疆進二秩佐劉公錡為東京留守司幹辦公事
順昌之捷不肖上功當時避之從子厚傳皆登第
厚終通直郎傳今從事郎子堪均皆世賞堪終通
直郎均今從事郎輯孫綱輕三世諸孫岐國寶惟
肖僅疇四世諸孫樛年震湘岐國寶震湘登第餘
以舉恩或以賞銓又有七世孫漸九世孫光選皆
登第叔宜今迪功郎光選今丞議郎爰自廣都散
居雙流獨
成都為多

李氏

李氏唐胄也大唐四十子少郎曹王五子少
即武衛大將軍偃武氏檀政偃入蜀來眉丹

稜伏民間五世孫瑜明皇西幸時抗表言狀得通
屬籍尋拜長江令卒官歸荃丹稜瑜四世曰遠遠
二世曰同為始建令葬籍縣同生全始居華陽又
三世曰惟吉惟吉三子曰莊曰允曰毅莊以學行
名毅以科第顯莊子大厚博學工文辭從兄天章
公大臨自謂不如大厚及長子陞同登第後三年
子降亦登陞五典州號循吏降行義克著范公鎮
薦之朝為金部郎中宣和間提學秦鳳路列臆刺
史拜宣撫使童貫降獨長揖曰我師儒官也遂丐
祠去力致仕陪大厚季子也有子時亮伯父陞欲
官之辭治命又以遺長官之章已上會陞子從政
郎時任卒時亮亟追還以與時任之子識後時亮
二子登第三子以恩得官諸孫一以舉恩得官一
登第去允子大臨第進士宋朝仕至天章閣待制
事在國史知制誥時繼李定辭頭其一也子陶隱
陶從司馬公光於洛當時大老皆喜之在錢塘蘇

公軾送之詩忠文文正二大老蘇李廣平三舍人
喜見通家賢子弟因言得邑少風塵其趣達矣隲
通達明敏吏事有能名尤工於書子時雍時敏皆
世其學時雍高廟稱之弟兄多顯者賞延凡二世
毅嘉祐二年進士李氏初起家者仕至殿中丞子
大昕大昕生公濟公濟生謨謨生崧凡四世登科
大昕有學行謨能文章謨以下徙導江族盛時仕
者不能悉書此其槩也曰頊者亦出自達與同並
世孫丞燦三世孫謹修謹交謹微謹思能登進士
第謹修位至颺守三子賞皆傳嚴卿最顯官至朝
散大夫郃又與謹微子椿登第郃官至朝議大夫
丞炳三世孫彤四世孫觀登第丞哲四世諸孫象
先厚登第象先應賢良方正科厚位至鴻臚少卿
厚五子皆官孫洋亦登進士第族大子孫衆多近
世有以世科名聞其世一曰自達而下郃第進士
四子樵孫梗孫材父今典州矣凡散居異邑者多

不書

張氏

張氏韶州曲江人至唐相九齡顯九齡弟九

臯九臯子抗抗七子仲方仲孚子孫在蜀可
譜仲孚孫奉常博士隨扈僖宗幸蜀傳三世曰載
陽貲產鉅萬豪待四方士子維峻待士益厚悉散
之或相戒止笑曰吾遺子孫者不在是也以子起
贈大理寺丞起寶元中登進士第官至太常博士
是故族也起家尤難如此三子太初太寧太和太
寧登治平四年第知邠漢渭等州四入為尚書郎
三持使節遷陝西路為都轉運使二子察宇察以
大小篆名入為左司郎中出知鼎州宇初名犯欽
廟諱易名宇三丞寺監使淮西東路知濟榮果合
四州娶榮國公百禄女故其學得之范氏子晦侍
學中原有外家典刑筆法尤工歷知雅恭簡三州
子仲堅是則家成都者太初家於崇慶之新津太

和家於眉州之眉山仲方之
後徙漢州之綿竹族尤大

宋氏

宋氏唐季有任崇文館校書郎諱玘者隨僖
宗西幸因家成都玘生綿州團練副使可思

可思生太子舍人顯顯第進士仕唐顯生武信軍
節度推官格格仕宋朝生惟吉惟亮號無為先生
生太常博士世修世修生球球與從兄弟璋後先
登第球終職方員外郎按譜惟吉惟亮子孫衆多
相似也惟吉後為盛璋球諸從兄弟子孫相似也
球後為盛按家傳無為先生嘗授經任公珩晚究
易球仕至麗守潔身早退子先因世賞至縣令亦
中年退休子昌宗典榮資二州將曹東蜀會鹽酒
法弊坐籍沒者又所在繫捕克斥獨論列為不可
法為士改猶申言不已由是罷歸諸子曰訓曰誨
諸孫曰邈曰述曰道曰運邈運登進士第邈終宣
教郎餘皆至麗守運總領財賦四川未及卒當時

惜之

勾氏

勾氏諱新繁隸華陽勾龍氏隸華陽隸郫隸溫溫皆祖勾望孔氏七十子曰井疆三國蜀

曰扶其裔也唐末有曰惟立以扈衛僖宗為將軍二子奔會王建攻彭州奔與勇烈侯楊晟死之會匪新繁民間遂隸新繁四世孫士良登慶厯六年第官至朝請大夫七子以賞以第皆有官第二子宗顏官至朝奉大夫第四子宗名與顏之長子濤迭登進士第濤貴在高廟時宰相趙鼎寶薦之鼎言蜀有鴻儒可充載筆之任然姓與御名音同臣未敢薦高宗曰古即有勾龍氏遂自涪陵召濤而勾氏著矣濤言事稱上意錄郎曹間歲除給事中大抵以薦士為己任士因濤薦召凡數十人後多為名臣唐公文若其一也序其外制集云爾以是為權相忌遂出除潭州力辭乞祠許之乞歸蜀不

許寓居秀華亭卒子躍從子距路踰蹠典三州兩
持使節除職帥夔卒餘以賞任官官至孫云曰詠
登宣和弟第二其子輔登紹興第賞為四川類省
第一亦族子也隸成都者自居體始著三世以上
惟曰出井疆莫可考居體登熙寧第官至朝請大
夫王公素使東蜀知其賢延請權領懷安軍事卒
懷安居居體素號鄉先生著書為多諸生從之廣多
知名九子二以賞得官梧獨久游太學以恩得官
二子昌世昌泰皆登第昌世官至朝散大夫位至
郡守昌泰為四川類省第一嘗除太學博士後徙
將作丞又丞太府兼戶曹郎出提舉常平浙東移
節浙西旋報罷歸起知利州除職帥夔卒從子子
皆有官即成都溫江以勾為氏猶曰勾惟立唐末
入蜀即其祖亦曰避高宗諱改為覆姓而世次率
不合曰廉登進士官至朝議大夫諸子皆有官從
子震雱同登進士即自郫隸成都者溫江則以中

立為祖曰是在雍熙間以宗學名曰中正之兄也
中正生希仲亦世其學以科第位至光祿卿王公
安石銘其墓曰勾宗華陽
世實兆京其援據云爾

常氏

京兆常氏為蜀人自有始哀相唐母兄偕偕
三世孫官戶部郎中扈衛僖宗駕入蜀者宥

也謫授蜀川戶掾卒葬江原二子包荒包蒙包荒
子達選達子延昱負奇才雷公有終來平蜀寇一
見奇之率從之謀有終守蜀數以書招致之延昱
始來有功家成都卒鄉人謚曰廉貞先生子禧禧
四子珙瑒琮玘皆登科珙守三州長子景修彭州
景修二子時中執中為郡守相自景以下名從中
從才者為一世從土者為一世城垣蓋珙諸曾孫
城知均州垣有隱操蚤與薦以親喪不復就類皆
隱居東山餘四十年蜀人大帥欲識之不可聲聞
於今隱然珙弟琮之子績禧弟利涉之子鎮踵登

崇寧二年第初延昱出從雷公選子守
元畱邛其後多通顯以隸他郡故不書

房氏

房氏以重為入蜀之祖重丞相玄齡八世孫也終新都令子諤為蜀太常少卿子四人皆

以從為名從之諸子八人皆以知為名知之諸子亦八皆以昭為名曰昭應號虛谷子有傳家文無名詩皆詣理曰昭庶洞曉樂道學仁宗朝以大臣為薦得旨賜對特授祕書郎合樂書行世國史有傳昭之諸子十八人皆以審為名審能審基皆舉進士審能官至朝議大夫審權著大樂演義即昭庶子也審之諸子三十八人皆以希為名希聲甫冠與貢常官太學希叅登元豐第官至通議大夫希之諸子六十四人或薦或第或廕或恩或贈而名率不齊其知名者五人曰淵太學上舍生克太學錄曰偉以恩得官而博學文辭知名西州又審權孫有曰璣曰永登政和宣和第曰時中贈官至

通議大夫又一世諸子踰百人名尤不齊曰與之
曰軾曰子中曰子邵曰震仲曰鉅皆登科與之視
諸從弟行獨年高宣和進士官至中奉大夫持節
潼州路故諸從弟今多在子邵興州官至朝請郎
震仲官朝請郎又一世諸子踰二百人惟大亮以
典三州顯咸以世科顯餘子及諸孫以賞得官者
五今在官者二
曰燾曰壽卿

呂氏

呂氏自眉彭山遷成都三世始著曰懷玉曰
公立曰陶世以風節聞陶世為元祐名臣三

子傳嗣延嗣緣嗣坐黨人子不達終右通直
郎子焯當用給事遺奏補官靖康多難格不行商
隱宜之疑之皆登第商隱第雖晚以四川類省第
一與素望合胡公元質鎮蜀薦之禮部侍郎李公
燾以自代召入除國子博士兼國史院編修官遷
宗正丞兼史院如初疑之以才為茶馬使者陳公

彌作宣撫沈公復見知後由茂州除閬州入對又以易學受知孝廟畱為太府寺丞與商隱同時會凝之卒商隱亦乞歸除守崇慶卒子盧宜之登第最早所至有治聲而坎墮率多異除通判彭州改辟通判茂州移黎州丁母憂辟通判成州除知簡州擬通判綿州黎州簡州罷非其罪復積二年迭聞兄弟喪卒於綿

杜氏

杜翊世以死節顯蜀舊守名其居曰忠義坊蓋以勸也事詳見於先賢志矣因其世祖甫

來依嚴武武卒甫旅遊衡陽二子宗文宗武畱蜀甫卒葬耒陽後返葬偃師故元稹誌甫墓謂孫嗣業終父志或者其家竟莫能出蜀也家青城實宗文裔十世孫準皇佑五年第進士官至朝散郎宰綿竹以卒妻黎攜諸孤外氏家成都黎教子嚴必使世其家第二子即翊世紹聖元年第進士官至

朝議大夫通判懷德軍靖康元年邊寇作西羌亦張奄至城下凡三旬援兵不至城陷翊世先火其家乃自縊死事聞特贈正議大夫命官其後十人五子慥沈以賞得官孫逸老俊老廷老曾孫光祖大臨以忠義遺澤得官翊世歿時慥棄官走視死所慟幾絕見者皆為流涕遂以喪招母魂歸葬餘孫自曾及雲今為士人指其門猶曰忠義杜云

宇文氏

宇文氏望河南自得氏以來有譜其以史學傳自唐諫議大夫籍籍子從禮為渠州

司馬因家于蜀後徙成都子孫又分六院曰成都曰雙流曰廣都曰綿竹曰嚴道曰閬中三院隸成都自司馬至院莫知其世世有從仁者後可譜再世從元又一世從廷從卿又一世從崇從緒從惟繼是子孫行率不類按譜始可類耳雙流院自崇而次始登第曰冊冊登嘉祐第任郡邑間卒李公

大臨稱為西州顏子子昌齡喬齡昌齡少年登進士甲科神宗廟遣監察御史詔言事如侍御史徽宗初為刑部侍郎子常子宰諸孫俱僕价子震與喬齡之孫仁皆顯价子震任任之子機皆第進士子震典著作兼為郎出總賦淮東晚守潼川价位至兵部尚書出以徽猷學士歷典大藩邑人見其家迭盛凡四世幾百年機令中成州其諸從兄弟又寢顯賞傳至孫矢廣都院自緒而下凡三世始登第曰邦彥邦彥初名褒登元豐第仕至郡相卒子閔中粹中虛中迭登第粹中第在第三後為尚書右丞虛中後為食書樞密院事終國信使諡貞愍天下聞其諡哀而敬之時中賜進士第後以直龍圖閣知潼川閔中及其子師尹師臯從子師中師獻孫紹紹直紹良從孫紹寅紹奕常為吏部郎典三州卒紹節典三州今被命紹直自郡守叅議大藩今奉祠紹猷紹彭紹紹莊今方典州子孫又多傳

視雙流亦不勝書也惟成都房自崇至降凡三世始以子樸貴贈官樸登政和第樸族弟谷從子臨望久望日華孫如石如圭曾孫開仲樂登第開仲今在官積世名位視雙流廣都為顯而科第不愧族望矣綿竹房亦未為顯然緒下孫之紹登第仕元豐間年餘四十與時論不合致其仕號止止先生母舅范公鎮也賦詩敬之司馬公先亦敬之程公珦後守漢州其子顯頤從之游子輝以明經第一及第仕至郡守邦彥與輝同世次視之猶兄弟然粹中時中亦待輝之子思忠猶同母兄弟粹中任思忠以官時中又任思忠之子師孟輝從弟彬登元豐第仕至郡守復自綿竹遷郫子仔仲仔仕至郡相二子猶世其賞仲亦登第是又隸成都矣綿竹房率聯得書故略

北劉氏

唐劉再思以御史從僖宗自蜀還京師留其子孟溫成都孟溫以儒學傳授成都中

三子長興偽蜀廣政十年補石室教授卒門人共
諡為寶中先生五世孫處厚處厚始登第四子靖
議竝翔議翔世其科處安四子竢端竊竑竢竊亦
登第劉氏家法方嚴長身偉貌世世稱其家家城
北異鄉人入北門問劉氏鄉人至謂之長劉然蒞
民率從厚至臨難其方嚴始見處厚官至左朝請
大夫范公祖禹第元祐循吏居之第三靖議皆為
張公浚幕客靖議不合流落州縣議受浚命往熙
河劉惟輔軍時惟輔軍驕將屬莫往獨靖議往惟
輔戰北議為敵所殺後十餘禩河南境復惟輔將
屬米知柔等來歸始言狀范公成大榜其所居節
義坊為此翊竊賞皆傳端雖不第從游甚衆自孟
溫至是八世今又一傳矣鄉
人以其五世不異籍尤義之

南劉氏

劉氏譜載三世名字卒月日耳四世曰惟
正曰惟盛曰惟道始詳惟正之子欽惟盛

之子長源後先登進士第欽使湖南官至朝議大夫
獻後賜第入館遷戶部郎官官至朝請大夫後
長源紹興初為監察御史典州除節官亦至朝請
大夫兩家子弟賞得官獻弟薨知荆門軍卒子述
今典州長源子思學賞今亦傳子參惟道三
世孫始登第曰晉或贈或賞而不年者不書

北郭氏

其自叙亦曰出汾陽王有藏汾陽王丹書

鐵券可證也譜失其傳今以稹為祖稹生承訥承
訥生希朴博極羣書晚精於易鄉人號曰有道先
生李公旼為作知命錄希朴前知死知命錄所以
作也四子仲曰友直蓄書嘉祐求遺書友直上千
餘卷皆秘閣所闕者叔曰友諒季曰友聞友文經
學鄉人號曰北郭先生仲叔氏子孫或家廣都或
從唐鄧獨北郭子孫不遷四子逢通通迪逢三子
行中剛中剛中選行中迭登元豐元祐第通七子

倫師中父中大中宜中時中由中倫父中同登崇寧第皆居甲科倫最通顯初仕太子學錄繼遷博士出為郡刺史凡四十任其提舉江南西路忤蔡京罷其帥潼川奏蠲虛額與都轉運使不合遂致其仕蔭補子孫十有三父中大觀二年召入冊定勅令後提舉常平河北東路嘗因星變上封事言新開邊皆不毛地小人邀功肆為誕謾書首入邪等罷歸吏部後復為郡守為刺史年六十一致仕大中有聲太學上舍以釋褐後召為諸王府記室兼講書守兩州三持使節事有異政由中擢上舍異等登宣和第後給事中勾濤薦之高廟題其姓名屏間歷守二州一持使節其學深文亦高政事自儒學出嘗守簡州人至今思之選五子勉中美中登第迪二子黃中登第三子皆有惠政官皆轉而二子至大夫餘子又多以子貴贈官北郭以中名者凡二十有六人

楊氏

楊氏自潼川徙郫繼徙成都譜實祖唐盈川令炯炯謫梓州司馬叅軍遷盈川既卒官還

葬潼國家馬盈川十一世孫天惠始家於郫以儒學稱自號回光居士元符末應詔上書入崇寧黨籍生伯唐伯唐遊太學十年不成受世賞四十二年以迪功郎年勞陞從政郎以卒時又謂不成鄉人以其道不行於時而自樂終其身共以靖安先生易其名其成乃如此子祖識家成都登第後不樂仕棲遯州縣間沈公价汪公應辰鎮蜀聞其名辟至幕府自是持節典藩視再世為顯蜀士論世不稱其官稱其德又諡曰樂行先生三子韶甫第進士諸孫叔寅以賞得官

城南郭氏

自陳來成都居來寨郭氏曰從一亦祖汾陽曰吾蔡川司徒家以子貴贈朝奉

郎子溥登大觀第初名將後更今名進士題名中實二名也嘗為樞密院編修官遷國子監丞出守

劍州積官朝請大夫贈至左金紫光祿大夫四子
伸似儀儔仲登宣和第儔登紹興第似儀則賞延
者伸官至朝請大夫職直敷文閣鎮興元兼安撫
利州似儔早死金紫光祿伸儀累贈云伸及儀賞及
世至似儔之子於是三畏三聘三握三接皆傳又
傳至諸孫曰可道曰德柄今惟德柄在子孫散居
城中城南尤顯亦
成都百年故家

施氏

施氏謂魯施季叔之後唐友諒從僖宗入蜀
不歸居岷山下七世孫光祚始居成都碧雞

坊又三世庭臣德脩同登宣和第從兄弟也庭臣
高宗朝為中書舍人晚居潭州卒德脩嘗除將作
簿兼秘書丞出守洋邛二州除簡州卒子次高次
尹皆以賞得官次尹官至朝請大夫今傳其子坤
之昔登紹興第曰晉卿又德脩從子也庭臣子淵
然仲舒登紹興第位至司農少卿遷中書門下省

檢正諸房文字子渠又世其科淵然雖不顯以文
稱於時初庭臣置田二頃贍宗族之貧徽猷閣直
學士胡公寅為之
記其族至今賴之

楊氏

楊最晚出自簡從成都祖慶安至孫始有登
進士第者四世孫承承子景溫又世科其盛

也四世孫至同薦者十有二是舉登進士第者四
又同堂兄弟皆復名以望為行蜀人號四望從望
民望最顯從望知蜀州有子曰之言登進士第今
知州民望位於朝歷左司郎中移太常少卿出知
綿州甫半載復以太府少卿總蜀賦又移兩節職
自直秘閣如直顯謨閣有子曰之復今通判綿州
民望有清名又名文章嘗自叙其世自四世慶安
已上得三世墳墓七世而上無客考至謂唐宋氏
族之學不明譜牒遂廢特起者恥其初微而不誌
昭穆甚者或求附甲族而過於傳會近世言其先

者必自唐扈三宗西幸或游至蜀居焉何古之蜀獨無人也且以楊氏之言在華在蜀皆承姓於姬而受氏於晉霍楊韓魏皆姬姓也儻於其支別考證未明則不必慕他郡之盛而必求其遺徙之故也近世以族著者因以附見焉

郫縣何氏

漢自何武死後不絕亦幸矣子況載武喪如北邙山瘞焉廬其下公孫述誅蜀

平況以喪歸郫縣東南按史武兄霸弟顯兄弟五人皆有名按志武後曰隨顯後曰包兄弟五人包子攀又皆有名曰英曰宗曰祗雖見之志第曰郫人爾莫知為武後也按譜武二世孫曰英五世曰宗宗子攀然英見之志在武兄弟前攀父曰包又與譜異或者譜為未詳不然何氏世世有譜當為蜀氏族第一矣然自漢至晉武弟顯之後猶傳如志云亦盛也譜遠不可盡考或居長安或徙江

南唐季有乾符進士待詔翰林知節自謂武商後
僖宗幸蜀加知制誥因歸郾卒葬膏澤鄉孫偉登
太平興國進士第嘗記景德寺邑人推為先生七
子子孫散居成都崇慶遂闡彭之崇慶永康之渠
江而武之族蕃矣偉三世孫邦基登元豐第官至
朝議大夫資及從子孫又三世俊茂登紹興第徙
崇慶偉從子繼甫繼甫曾孫援登大觀第鉉孫碩
頤預又世科而家成都者曰騰登紹興第至郡守
亦自郾
徙去

王氏

王氏曰簡隨唐僖宗入蜀因畱蜀四世坦為
郾人贈通奉大夫子寃定國覽定國登治平

四年第更名覺正和二年以直龍圖閣知桂州討
殺溪洞蠻有功進顯謨待制三年丐祠得提舉成
都玉局觀卒累贈特進寃子梅以覺蔭補將仕郎
覽補登仕郎覺三子曰猷補登仕郎隨覺官南方

克廣西經畧司內機法檄至邕州染瘴卒朝廷以
職死特命長子煥以官煥官至從政郎曰權補將

仕郎曰棟補承務郎累官朝奉大夫通判
巴州棟子燾將仕郎燾卒於承議郎

邵氏

邵氏以唐郾城令錫為祖燕其始封也宋初
自丹陽聞岷山勝槩來家於岷之陽曰慶餘

三世曰才始登治平第嘗入尚書為郎贈其父仲
良為大中大夫子孫皆官長子充官至朝請大夫
賞又傳三子贈才官至銀青光祿大夫邵公溥撫
蜀帥言丹陽邵公必嘗薦洛邵公雍於神廟溥蓋
雍之孫故溥講丹陽好待充如
兄邵氏在蜀於是為故家矣

申氏

申氏貫北京蜀廣政中曰幹臣始來青城子
孫居郾幹臣四世孫曰起曰宗起累贈朝請

大夫有子曰祖錫曰積中同登元豐五年第祖錫
終朝奉大夫積中終奉議郎永興軍路提舉學事

祖錫子說終宣教郎說迪功郎積中子詮以臣僚列奏積中孝行特授將仕郎終於雒縣丞孫伯時登淳熙元年進士第終晉原主簿宗始徙溫江四世孫曰叔度五世曰叔檢叔懷皆登進士第

詹氏

詹氏貫邛州安仁曰文舉以子貴累贈正議大夫子曰權登元豐進士第終於巴州權子

廷哲廷碩廷彥自邛始遷居郫廷哲終通直郎廷碩終朝請郎廷彥終從政郎廷哲之子隸廷彥之子籲皆登進士第

張氏

張氏俞隱居岷山七被詔命不赴賜以官又乞回授其父號曰白雲先生大節見國史事

見先賢篇俞二子石民楚民登元豐進士第官至正奉大夫子曰吉甫以賞終朝奉大夫子伯振又以賞為青城令卒官石民死子雲從孫文叔夏曾孫山父

王氏

王氏望太原唐末避亂入蜀居郫曰彥生四子次子曰延壽生四子次子曰景以孝名邑

人號王孝子景生四子曰慶祖慶來慶餘慶宗傳世特盛散居成都永康資中富順惟慶宗之後不遷至曾孫蔭登大觀第位至郡守玄孫曰僕為朝議大夫賞傳至孫宅院子孫或賞或第每歲上已閭族無遠近共脩祀事於縣東之塋人指為孝子冢

楊氏

楊氏居郫縣凡四世至邁始第進士官至左朝議大夫直祕閣主管環慶路經略安撫司

公事累贈文叔淵光祿大夫邁卒累贈宣奉大夫邁子衍朝請大夫邛州曰思成儒林郎久成二子蕃卿從政郎萃卿修職郎思成一子漢卿將仕郎

張氏

張氏昔望崇慶之永康門望如初有遷於郫之犀浦鎮其為族望亦稱克尚五子第三子

曰礪即遷犀浦者礪孫曰天迪曰煥曾孫曰汾曰
洙曰漢玄孫曰嶧曰岐皆擢進士第又有遷於崇

寧者其後視

犀浦尤顯

文氏

文氏以丹淵先生同為望同貫潼川之安泰
位雖未高以蘇先生軾為友名重當時其文

號丹淵集同官四川樂岷山勝槩欲家焉不果子
孫始來居鄆有丹淵集曾孫仔紹興丙子進士青

城尉卒四世

故書尚無恙

新繁彭氏

彭氏曰景直唐中宗時為太常六世孫
敬先常以左拾遺隨僖宗入蜀家於普

州敬先孫濟民攜二子由普徙益長子生福次子
生秉乘於宋仁宗朝翰林學士國史有傳乘卒三
子不克歸國史載乘為華陽人繁華陽皆隸成都
而秉實以太平興國八年生於繁見於故待制韓

公駒所為跨黿先生李公新集序曰繁上則彭乘之文辭云福生顯行顯行曾孫登政和二年進士第官至左朝散大夫知彭州贈其父望官至朝議大夫二子極材以廕補官卒季子傑從子仁徹同年貢於鄉仁徹登第官至文林郎極子亦第進士不待年致仕

周氏

周氏望汝南入蜀家於繁曰贊之孫頊有隱德號正晦先生二子曰洙曰淳洙生表權淳

生庚庚生尹及申表權尹同登慶曆六年進士第表權後知漢州尹知梓州蘓文忠公軾文定公轍時皆在朝各賦詩送之初李稷使蜀權茶為蜀病表權與尹論合與稷異為稷誣奏罷去尹嘗知利州後為侍御史奉使入蜀迎母而賜五品服還至陝除節荊湖北路後知眉州丁母喪喪除入為主客郎遷考功兼權吏部元祐四年表權再知漢州表權奏改名表臣尹自是守梓梓漢相望即此時

右仁生桓桓生京京生衍同登科聯四世右賢孫良孺曾孫德之祖孫又相繼登科德之嘗為四川類省第一皆文禮之後也熙寧中邑令徐九思表其坊曰叢桂作堂於邑東延壽院繪五世像號叢桂堂邑人榮之有散而居汴居大安客歷陽徙依政者皆祖諫官今居崇慶者又自雙流徙其居汴者即公延渥之後譜稱延渥後更名渥有女孝章皇后其後譜聞唯彭山雙流依政譜可考子孫文行聞於時者衆獨雙流以隸成都故詳

鄧氏

鄧氏曰元明居梓中江以富名王建縣開來圍成都元明開帑廩惟建取前後數百萬計

建欲官之元明曰不願也願公安輯一方不然兩川皆魚肉矣建欣納官其子宏中州刺史宏生隆孟蜀時為資州刺史二子曰鎔曰釗釗生文溥文溥生琛均順薦亂琛文謁高貲且諭諸富人無靳

邑人以故保全家頓貧徙雙流以經學誘後生羣
聚至數百人翕然知學有子曰至學益大號二江
先生范公鎮為之友榮公百祿從之游以子貴至
贈太師琛亦贈太保琛生六子至其一也至四子
館續鎮先後登科館試禮部為第一季登科時神
宗臨軒館為翰林學士侍唱名至館鎮下殿謝子
洵仁洵武從子邵聯唱名於是館聯謝執政因奏
鄧至善教上曰知之於是時鄧氏以為寵館後除
龍圖閣直學士知鄧州改知滁州洵仁尚書右丞
洵武知樞密院洵武子雍亦以侍從終以故賞延
子孫為多凡子孫之散居者曰成都曰蘆曰嘉曰
廣安曰懷安之古城鎮曰普曰夔而雙流族所未
顯者惟二江先生至之兄弟之後亦異矣雍子椿
機位至郡守椿念再世名位在宣政童蔡間率太
息一日得洵武諫伐燕疏亟乞蜀守汪公應辰識
之應辰曰事具國史矣亦為之跋椿哭先墓下以

告蜀土謂為人
孫如此皆賢之

張氏

張氏漢綱之後綱卒瘞疑為武陽唐大中時
有天子祺者自武陽徙江源卒瘞後有白檀生

墓間號白檀張氏五傳至中理舉逸民不就即拜
將作監主簿子曰公謹元祐五年五經出身累贈

少師公謹之子深徙雙流登崇寧第累遷夔州路
轉運判官張丞相後宣撫川陝承制黜陟除深潼

川路提點刑獄改轉運副使遷知夔州中書舍人
勾濤論馬政力薦深除管川陝茶馬繼除都轉運

使以制置使胡公世將議酒法不合改除瀘州因
母祠請老子孫多以賞得官子珏慎孫徽之安之

皆郡
守

張氏

張氏先世曰守珪朝奉大夫若訥若愚孫協
字一冉世弟兄登科協為詩有唐人風後終

於宣議郎其弟
終茂州別駕

郭氏

郭氏先世曰絳以至孝有聲州里子卯貢上庠中第官終於部刺史秦丞相檜與卯有庠

序之舊及當國卯絕弗與通歷相三郡家食凡一十八年晚年號亦樂居士子皆以賞惟民復世其科嘗入為宗正丞知崇慶府除夔州路轉運判官未赴卒孫以祖賞得官曰道子

梁氏

梁氏七世曰介紹興丁丑進士第三人為校書郎乞彭州歸遷利州路轉運判官兼四川

宣撫司叅議官改知瀘州居歲餘民吏便安之詔改瀘南兼安撫一路以旌其能瀘州為一路安撫自介始梁丞相克家薦之有旨詔赴行在道遇病辭得主管冲佑觀再召又辭除知遂寧府未赴卒二子皆得官曰种曰穆從子自類省奏名曰梓

李氏

李氏系出隴西自叙云七世祖騏隱五季間聞蜀多名山遂挈二子及宗屬自鼎澧入蜀

遊岷峨棲於雅州之瓦屋世祖迪為儒生其家雙流自曾祖元義元義生文顯文顯生某某亦學道因出遊學放浪山水間不歸其葬也以衣冠三子師尹庾崧卿庾入太學與四方賢士交獨於李光泰發最厚晚樂善好施子大年甚似之二子嘉謀嘉猷同登第嘉猷好學工詩文官至宣教郎嘉謀嘗入為宗正丞出守二州

繼持節作牧又典州云

廣都費氏

費氏自叙曰大費佐禹平水土有功今其裔也史冊費氏多賢其入蜀莫知何

自從常璩華陽國志贊先賢曰師義至仁費奉君貽字也貽不仕公孫述佯狂漆身墓今在成都東南則蜀有費舊矣曰禕曰詩墓皆在詩子立孫盛蜀世譜云益州諸費有名位者多詩之後南宋時

游為寧蜀郡太守墓亦在雙石闕甚偉廣都北有鄉曰石柱雙指闕也王氏偽蜀有曰宗陶曰叔熊皆為輔佐宗陶之後為廣都房叔熊之後為沙渠鎮房宗陶子曰順初順初有族子曰黃裳舉孟蜀進士第一孫曰韜韜生傳誨傳誨生得珪得璋得珪生惟亮惟古惟亮生襄舉孝廉惟古生二子曰策調蒲江簿曰求登熙寧第官雖止眉山令而博學為鄉先生求生開開生樞機桓樸植子申之孫士戣士寅士威皆後先登第申之孫士寅又於四川類省第一士寅終右史士戣典州策之子曰汝弼孫曰安中曾孫曰行之玄孫曰士充汝弼行之安中士充亦後先登第行之常於中書門下省檢正諸房公事終直寶文閣沙渠房亦蕃登第相望實隸邛州惟雙流蓋廣都別名在漢曰廣都隋以諱更為雙流唐兼存之故雙流房曰振舊游太學登紹興第三子太猷太川太臨實世其科太川後

為四川類省第一太猷典州雖兩邑子孫繁簡不齊實望族也

馬氏

馬氏族七世曰捷嘗登進士第不克顯曰騏始著騏登紹興進士第執政楊公椿薦之高

廟有旨召騏辭召乃發賜對除軍器監主簿孝宗初元遷起居舍人兼侍講權中書舍人有旨權直學士丐祠除知遂寧眉州使權潼川路知潼川除祕閣脩撰奉祠知瀘州再知遂寧除右文殿脩撰再知潼川卒有子覺世其科自郡守召為太府少卿從子興孫亦登第

張氏

張氏族世曰大同登紹興進士第嘗教授成都解官不復出三奉祠祿多著書號淡齋先

生于敬修從子
事修皆登科

溫江文氏

文氏自謂漢文翁裔有龜年者唐乾符中明經及第至彰明令孫曰谷為孟蜀

侍御史再傳曰大章任宋為國子祭酒谷兄弟五人一居漢州一居梓一居綿一居邛一居溫江云
居溫江者曰祥有經學邑人師之曾孫譽遂登元
豐第積官及贈至中奉大夫二子振道振奇孫人
中族子振德振鷺諸從孫定
中安中衡中達之繼世登第

袁氏

袁氏以天綱為祖史曰天綱益州成都人也
溫江西二十里曰淘壩鎮有井號天綱井其

喬環居井側有名芝者於鎮建寺有異應費元量
楊徽胡叔豹皆蜀賢大夫為之記載芝子孫蕃衍
鎮莫能容四世子昌年遂徙溫江鴻為廣文館生
試中上游縣為立擢秀坊子孫遂連取名第自省
大才大明大聲仲午桂凡
七人鄉舉中選者過倍

蹇氏

蹇氏祖蹇叔唐有侍臣曰蹇道原從僖宗西
巡僖宗謂曰蹇不利東北因更氏曰蹇後有

居懷安軍金堂曰逢生二子長曰綬綬生汝明皆登第為金堂開家及曰紹徙溫江子汝礪迪功郎汝能贈承事郎子孫皆登第者曰克諧曰誼曰騏曰寅望

新都沈氏

沈氏唐末有工部郎中穆之隨僖宗入蜀居新都之彌牟鎮穆之世孫自紹興

進士官至朝奉郎知榮州一世孫曰仲巽後明子震仲巽皆第曰恪曰樞十一世孫曰仲巽後明子震仲巽皆第進士官至通直郎仲巽修職郎恪以賞樞以恩皆得官樞迪功郎

楮幣譜

蜀民以錢重難于轉輸始製楮為券表裏印記隱密題號朱墨間錯私自參驗書緡

錢之數以便貿易謂之交子凡遇出納本一貫取三十錢為息其後富民十六戶主之尋亦貲衰不能相償爭訟數起大中祥符末薛公田為轉運使請官置交子務以權其出入不報寇公城守蜀乞

廢交子不用會臧去而田代之詔田與轉運使張若谷度其利害田若谷議以廢交子為非便請為置務禁民私造條奏甚悉又詔梓州路提刑王繼明與田若谷共議田等議如初詔從之始置益州交子務時天聖元年十一月也自二年二月為始至三年二月終凡為交子一百二十五萬六千三百四十貫其後每界視此數為準交子舊以二月二十日起界清獻公為記時以遷至七月也熙寧五年續添造一界其數如前作兩界行使從監官戴蒙之請也每道初為錢一貫至十貫寶元二年以十分為率其八分每道為錢十貫其二分每道五道若一貫至四貫六貫至九貫更不書放熙寧元年始以六分書造一貫四分書造五百重輕相權易於流轉於是蒙又請置抄紙院以草偽造之弊引有兩界與官自抄紙皆自蒙始大觀元年五月改交子務為錢引務所鑄印凡六曰勅字曰大

料例曰年限曰背印皆以墨曰青面以藍曰紅圓以朱六印皆飭以花紋紅圓背印則以故事監官一員元豐元年增一員掌典十人貼書六十九人印匠八十一人雕匠六人鑄匠二人雜役凡十一人廩給各有差所用之紙初自置場以交子務官兼領後慮其有弊以他官董其事隆興元年始特置官一員莅之移寓城西淨衆寺紹熙五年始創抄紙場於寺之旁遣官治其中抄匠六十一人雜役三十人凡引一界滿納舊易新率千人取錢六十四曰貫頭錢天聖初止三十建炎初增八紹興十一年乃增今數其納換不盡者曰水火不到錢今一界所收併貫頭錢凡一百九十萬道總領所權取以供軍儲所印之數自元豐元年兼收兩界之後紹聖元年增一十五萬元符元年增四十萬道祖額每界以一百八十八萬六千三百四十為額以交子入陝西轉用故也崇寧間用兵陝

西開拓境土通行引法以助兵費元年增二百萬
二年增一千二百四十三萬五千四年增五百七
萬五千大觀元年增五百五十四萬五千六百六
十六比至換界以新引一當舊引四引法大壞尋
有詔自四十一界至四十三界更不許換四十四
界止依天聖舊額仍不得越銅錢界建炎二年罷
鑄錢復用元符所增之數紹興元年增六十萬二
年增一百四十萬三年增五百萬四年增五百七
十萬五年增二百萬六年增六百萬皆以給利夔
兩路軍費七年有旨不許泛印八年以邊報急闕
增三百萬克糴買九年以移屯陝西合給糴本及
陝西六路新復州軍衣賜增二百萬增數既多食
書樞密院事樓照奉使陝西奏禁泛科始定著刑
章十年以贍軍急闕增五百萬十三年以都運司
之請增四百萬二十九年以增招軍兵椿辦犒賞
總領所請增一百七十萬詔從之自後累增五百

餘萬凡兩界共為錢引四千六百四十七萬二千六百八十紹熙二年有旨將八十三界錢引展一界行使增印銀一百九十萬以償總領所兌引貫頭水火不到錢之數慶元三年總領所奏以成都潼川利州三路旱場制置司減免民間租賦乞增印錢引以備對補有餘以充賑濟詔增一百萬逮今合四千九百三十七萬一千六百八十道矣而又偽造竊行足以亂真引日益增錢日益銷子母不能相權然有稱提之法以錢稱提者引價低則官出藏銀增價與民市引是也以法稱提者凡民以錢輸官當折引則以一貫二百八十為限是也蓋有錢則有引天聖所印之數視錢以為準者也自軍興增科鑿空為錢天下大計仰給於紙猶幸守和議引之出納有常半藏諸司之庫半流轉於民維持不壞識者有憂其在軍旅之際乎

式 幣 楮

引 錢 名 一 子 交 名 一

分 界

號 年

例 料 行 五 頭 貼

印 紋 花 字 勅

印 紋 花 面 青

印 事 故 團 紅

印 紋 花 限 年

印 背 事 故 貫 一

印 背 事 故 百 五

書 放 額 數

第十七界

辛巳年 紹興三十一年

至富國財并

金雞 捧勅

合歡 萬歲 藤書

龍龜 負圖 文龍

三耳 卣 龍

吳隱之 飲餽 泉賦 詩

王祥 孝感 躍鯉 飛雀

貫文

書放錢引二千

三百七十三萬

六千三百四十

第十七界

癸未年 隆興元年

利足 以生 民日

慶攀 雲枝 捧百

寶上 鼎苑 圖平

花極 西圭 璧

天皮 幣 馬來 薦

貫文

書放錢引三千

二百七十三萬

六千三百四十

第十七界

乙酉乾道元年

強本而節用

金樓花捧

去樓去樓

朽栗

堯堯

漢循吏增秩賜金

卜式上書獻家財

書放錢引一千

二百七十二萬

六千三百四十

貫文

貫文

第十七界

丁亥乾道三年

舊法行爲便

雙龍圓嘗

方圓嘗入

孟六

子罕錢

青書放錢引一千

二百七十二萬

六千三百四十

貫文

貫文

貫文

貫文

第七十五界

辛卯乾道七年

善治立經常

九重捧勅

川心龜紋玉連環

孟子見梁惠王

壘壘如如意

書水火金木土穀惟脩

唐太宗時外戶不閉米斗三錢

書放錢引一千二百七十三萬六千三百四十貫文

第七十四界

巳丑乾道五年

事序貨之源

國鳳捧勅左臯右夔

王逸超衆果荔枝

諸葛孔明羽扇指揮三軍

千葉石榴

周宣王脩車馬備器械

兩塔舞干羽

書放錢引二千三百七十三萬六千四百貫文

第七十七界

乙未淳熙二年

維幣通農商

盤龍捧勅

魚跳龍門

同律度量衡

連環萬歲藤

武侯木牛流馬運

傅說版築

書放錢引二千
三百七十三萬
六千三百四十
貫文

第七十六界

癸巳乾道九年

化國日舒長

雙龍捧勅

龍牙黃草花

祖逖中流擊楫誓清中原

百合太平花

舜作五絃之琴以歌南風

伯夷公老二老歸文王

書放錢引二千
三百七十三萬
六千三百四十
貫文

第七十八界	分
丁酉淳熙四年	號年
道御之而王	貼頭五五行料例
龍鳳捧勅	勅字花紋印
纏枝太花	青白花紋印
漢高帝捧玉卮馬太皇壽	紅團故事印
勝金鏤甲紋	年限花紋印
文王鷄鳴至寢門問安否	一貫故事背印
百姓遮道願借寇恂	五百故事背印
書放錢引一千 三百七十三萬 六千三百四十 貫文	書放額數

第七十
年六
利爲
勅捧
花葉
下天
花蓮
器備
樓邊
貫文

第
亥
以國
金
枝金
堯
纒
宣
李
書
放
錢
引
二
千

淳
熙
義
吾
玉
垂
舜
枝
纒
王
德
裕
二
百
七
十
三
萬

九
爲
捧
葉
治
衣
金
脩
建
六
千
三
百
四
十

牋紙譜

古者書契多編以竹簡其次用縑帛至以

簡太重縑稍貴人遂以紙爲便倫宦者也傳多稱

其能然受宮掖風旨詔親貴猶宦者態也智足以

創物而亦足以殺身第于文字有功人至今稱蔡

倫紙

今天下皆以木膚爲紙而蜀中乃盡用蔡倫

法牋紙有玉版有貢餘有經屑有表光玉版貢餘

雜以舊布破履亂麻爲之惟經屑表光非亂麻不

用於是造紙者廟以祀蔡倫矣廟在大東門雪峰
院每遇歲時祭祀香火累累不絕易以西南為
坤位而吾蜀西南重重厚凡紙亦然此坤之性也故物生
蜀者視他方為重厚紙亦然此地之宜也府城
之南五里有百花潭支流為二皆有橋焉其一玉
溪其一薛濤以紙為業者家其旁錦江水濯錦益
鮮明故謂之錦江以浣花潭水造紙故佳其亦水
之宜矣江旁鑿臼為碓上下相接凡造紙之物必
杆之使爛漚之使潔然後隨其廣狹長短之制以
造研則為布紋為綾綺為人物花木為蟲鳥為鼎
彝花紋雖多變大抵因時之宜非意為之也紙以
人得名者有謝公有薛濤所謂謝公者謝司封景
初師厚師厚創牋樣以便書畫因為名薛濤本
長安良家女父郾因官寓蜀而卒母孀養濤及笄
以詩聞外又能掃眉塗粉與士族不侔客有竊與
之宴語時韋中令臯鎮蜀召令侍酒賦詩僚佐多

士為之改觀期歲中令議以校書郎奏請之護軍
曰不可遂止濤出入幕府自舉至李德裕凡歷事
十一鎮皆以詩受知其間與濤唱和者元稹白居易
易牛僧孺令狐楚裴度嚴綬張籍杜牧劉禹錫吳
武陵張祐餘皆名士記載凡二十人競有酬和清
僑止百花潭躬撰深紅小彩牋裁書供吟獻酬賢
傑時謂之薛濤牋晚歲居碧難坊瓶吟詩樓偃息
於上後段文昌再鎮成都太和歲濤卒年七十三
文昌為撰墓誌謝公有十色牋深紅粉紅杏紅明
黃深青淺青深綠淺綠銅綠淺雲即十色也楊文
公億談苑載韓浦寄弟詩云十樣蠻牋出益州寄
來新自浣花頭謝公牋出於此乎濤所製牋特深
紅一色爾偽蜀王衍賜金堂縣令張蠡霞光牋五
百幅霞光彩疑即今之彤霞牋亦深紅色也蓋以
胭脂染色最為靡麗范公成大亦愛之然更梅濤
則色敗萎黃尤難致遠公以為恨一時把玩固不

為久計也 凡紙皆有連二連三連四售者連四一名曰船牋 又有青白牋背青面白有學士牋長

不滿尺小學士牋又半之做姑蘇作雜色粉紙曰假蘇牋皆印金銀花於上承平前輩蓋常用之中

廢不作比始復為之然姑蘇紙多布紋而假蘇牋皆羅紋惟紙骨柔薄耳若加厚壯則可勝蘇牋也

蜀牋蓋以其遠號難致然微紙池紙竹紙在蜀蜀人愛其輕細客販至成都每番視川牋價幾三倍

范公在鎮二年止用蜀紙省公帑甚多且怪蜀諸司及州縣紙牘必用微池紙范公用蜀紙重所輕

也蜀人事上則不致輕所重矣此以價大小言也余得之蜀士云澄心堂紙取李氏澄心堂樣製也

蓋表光之所輕脆而精絕者中等則名曰玉冰紙最下者曰冷金牋 廣都紙有四色一曰假山南

二曰假榮三曰冉村四曰竹絲皆以楮皮為之其

視浣花牋紙最清潔凡公私簿書契券圖籍文牒
皆取給於是廣幅無粉者謂之假山南狹幅有粉
者謂之假榮造於丹村曰清水造於龍溪鄉曰竹
紙蜀中經史子集皆以此紙傳印而竹絲之輕細
似池紙視上三色價稍貴近年又倣池法作勝
池紙亦可用但未甚精緻爾雙流紙出於廣都
每幅方尺許品最下用最廣而價亦最賤雙流
無有也而以爲名蓋隋煬帝始改廣都曰雙流
疑紙名自隋始也
亦名小灰紙

蜀錦譜

蜀以錦擅名天下故城名以錦官江名以濯錦而蜀都賦云貝錦斐成濯色江波遊

蜀記云成都九壁村出美錦歲充貢宋朝歲輸
上供等錦帛轉運司給其費而府掌其事元豐六
年呂大防始建錦院於府治之東募軍匠五百人
織造置官以莅之創樓於前以爲積藏待發之所

榜曰錦官公又為之記其略云設機百五十四日用挽綜之工百六十四用杼之工五十四練染之工十一紡繹之工百一十而後足役歲費絲權以兩者一十二萬五千紅藍紫蒨之類以斤者二十萬一千而後足用織室吏舍出納之府為屋百一十七間而後足居自今考之當時所織之錦其別有四曰土貢錦曰官告錦曰臣僚襖子錦曰廣西錦總為六百九十疋而已

轉運司錦院織錦名色

即成都府錦院

土貢錦三疋花樣

八答暈錦

官告錦四百疋花樣

盤毬錦

簇四金鵬錦

葵花錦

八答暈錦

六答暈錦

翠池獅子錦

天下樂錦 雲鴈錦

臣僚襖子錦八十七疋花樣

簇四金鴈錦 八答暈錦

天下樂錦

廣西錦二百疋花樣

真紅錦一百疋

大窠獅子錦 大窠馬打毬錦
雙窠雲鴈錦 宜男百花錦

青綠錦一百疋 青綠雲鴈錦
宜男百花錦

茶馬司錦院織錦名色

茶馬司須知云逐年隨蕃蠻中到馬
數多寡以用折傳別無一定之數

緋甲被
七八行錦

緋大被

瑪瑙錦

敘州

真紅大被褥

真紅雙連椅背

真紅單椅背

南平軍

真紅大被褥

真紅雙窠錦

阜大被褥

青大被褥

文州

犒設紅錦

細色錦名色

青綠瑞草雲鶴錦

青綠如意牡丹錦

真紅宜男百花錦

真紅穿花鳳錦

真紅水林檎錦

真紅櫻桃錦

真紅雪花毯錦

真紅黃水林檎錦

紫阜段子錦

真紅天馬錦

真紅飛魚錦

真紅聚八仙錦

真紅六金魚錦

秦州細法真紅錦

秦州中法真紅錦

秦州鹿法真紅錦

真紅湖州大百花孔雀錦

四色湖州大百花孔雀

錦

二色湖州大百花孔雀

器物譜

玉璧玉印各一印文似成信字雍州兵於成都縣獲之衛瓘以上之相國府魏咸熙

元年於是司馬氏宣示百官仍藏之府公孫述起成都自號成家三五之文殆述作也

淳于古禮器也廣漢什邡人段祖以獻之益州刺史始興王蕭鑑高三尺六寸六分圍三尺四寸圓

如簫銅色如漆甚薄上有銅馬以繩貫馬令去地尺餘灌之以水又以器盛水於下以芒莖當心跪

注淳于以手振芒則聲如雷清響良久乃絕古所以節樂

古鐵鑑一王宗壽字永年建族子得之江源下有篆文十二字宗壽覽照見一青衣小兒坐酒樓上試令人訪之青衣隨至謂宗壽曰何以知我宗壽以實對青衣曰吾失此百年矣知在公處故此盤桓公其還我宗壽出而與之青衣剖腹納長揖而去宗壽有辟穀吐納之術或謂得之青衣今載其篆文云

龍宮寶藏神和子鑄永年萬歲

銅印一廣政十四年冬十月十五日彭山縣副將頭楊富獲於江岸印有六面方各寸許皆有篆文

兩面共通一竅竅中三虛一實其直可貫其圓有規六面篆文共八十二分夾其竅六十均在四

旁各成文章印過雕鏤有竅面各一十字無竅面
各十五字以印進上嚴築作瑞篆記今楷其篆文
備考一面天國老君生萬民治中國外國人和璽
凡十五字其相對一面云老君授生輔天下國安
平受道人長生凡十五字又一面虛無自然明日
月辰星光凡十字其相對一面云玄女致和氣玉
女致天醫凡十字又一面上國僊師天師老君道
成明天地政璽凡十五字其相對一面云上名吾
拜無為大昊通天下
洽氣同璽凡十五字

小金印一建炎初盧公法原修治羅城役夫得之
以獻公因會鄉老出而薄觀有識其文者曰漢破
氏羌侯五字字分作三行漢字居其一公以印寄
帑紹興十年胡公世將掇於剡家灣張公壽一因
取送胡公按漢土德故印章以五成此
先漢時物但不知封侯者為何人也

唐鐵券二昭宗以賜陳敬瑄田令孜也券形方如半甌縱長尺餘橫廣不及二尺以金為字俱在軍資庫但金已剝落無餘字益漫滅間有不可識者敬瑄以中和三年十月受賜令孜以四年十一月受賜僖宗猶在成都明年僖宗還京師後此八年當景福六年四月二人俱為王建所殺據新唐書蓋同日死令孜與敬瑄實斲削唐室何功之有焉雖冒受此券卒不可用天道果昭昭乎券字益就漫滅可惜敬瑄券文承旨樂明龜作唐末之號令文章其氣象類如此也其略曰烹巨鰲者鼎大於滄海斬長鯨者觚倚於青天既立異勲克膺殊寵李晟免其十死子儀成其九功鎮以金鑰賜其鐵券後來繼者豈在他入又曰致朕身安由卿忠蓋前封公爵後錫郡王詢於衆情未愜羣望今賜卿鐵券舍卿十死瑄鐵券官宰臣姓名漫滅不可復識田令孜鐵券文其略曰人臣之績古今莫儔爵

位不足以答元勲竹帛不足以紀大節式遵盛典
用表殊庸宣賜駱谷扈從定難中興社稷功臣仍
恕十死宰臣裴澈敬瑄令孜與建罪等耳敬瑄令
孜幸而不成是以建獨曰叛方中和褒敬瑄功時
曰子儀曰晟不得專美於前令孜又自有宦者來
無此榮也識者謂墓石猶硤石爾無用也鐵券其
不類是乎使無一卷
史書君子何所持哉

塔玉隋蜀王秀作鎮井絡開益州福感寺塔基全
是一石令人掘之尋縫至泉不見其際風雨暴至
人有於石傍鑿一片將出乃是鸞玉世間希有
寶商商曰此是真鸞玉問於識

歲華紀麗譜

成都遊賞之盛甲於西蜀蓋地大物
繁而俗好娛樂凡太守歲時宴集騎

從雜沓車服鮮華娼優鼓吹出入擁導四方奇技
幻怪百變序進於前以從民樂歲率有期謂之故

事及期則士女櫛比輕裘絃服扶老攜幼聞道嬉遊或以坐具列於廣庭以待觀者謂之遨牀而謂太守為遨頭仁宗朝以益州重地嘗謀帥命宋公祁宰相對曰蜀風奢侈祁喜遊宴恐非所宜仁宗不從卒遣之公先奉詔修唐書因以書局自隨自成都每宴罷盥漱闌寢門垂簾燃二椽燭媵婢夾侍和墨伸紙望之者知公修唐書若神仙焉嘗宴於錦江偶微寒命索半臂諸婢各送一枚公視之慮有厚薄之嫌訖不服恐冷以歸舊俗傳誇以為談本田公況嘗為成都遨樂詩二十一章以紀其實而薛公奎亦作何處春遊好詩十章自號薛春遊以從其俗且欲以易尹京之舊稱此皆可以想承平之遺風也至清獻公為紀乃曰曩時宴會皆牙校掌之蓋權酷之利有餘人樂於為役公帑歲入亡慮千萬貫有奇自新法頒行酒坊為官所鬻牙校雖得券錢不足自贍乃者議置成都市易務

方遊觀時人情瞿然減常歲之半及浣花後始聞罷去乃復朋聚游江今公使錢歲給三萬貫常凜凜慮不足譬之巨人以狹衾寢覆趾則露肩擁左則闕右甚可笑也今盤饌比舊從省樂優之給亦復過殺設遂廢之則非天子所以付畀一隅惠保遠人之意而小民之驚者果者旦營暮供藉以為養此遊宴之不可廢也觀公此言則蜀人之貧富欣戚可以之知政矣今以元日為始而第其事

歲華遊宴節

正月元日安福塔二日東郊五
日蠶市即蠶叢遺俗也上元燈二

十三日聖壽寺前蠶市二十八日保壽侯誕期
二月二日踏青八日藥市三月三日學射

山九日藥市二十一日靈智禪師寂日宴海
雲山山有小池士女探石其中占求子二十七

日大西門蠶市寒食怡忠院四月十九日浣
花佑聖夫人誕日五月五日大慈寺六月初

伏日宴會監司中伏日宴會職官末伏日宴會州縣七夕大慈寺門樓七月十七日大慈

寺散孟蘭盤宴九月九日登高冬至日宴金繩寺以上太守出遊大宴於其處士女盛遊偕

樂

明簡紹芳楊升菴年譜公姓楊氏諱慎字用脩別號升菴其先廬陵人六世祖諱

世賢者元末避歐祥之亂徙楚麻城再避紅軍亂乃入蜀居新都世賢生壽山隱德弗仕樂善行誼鄉閭化之有李佛子之稱蓋世賢贅李氏子孫冒其姓也壽山生政字美玉習春秋善歐書元配郭氏生子二曰遠曰政卒娶羊氏無子卒娶熊氏生子三曰春曰惠曰哲以貢士仕為貴州永寧吏目却土官之賂金正州民之地界貴陽人傳誦之卒於官遠政亦相繼歿熊氏夫人攜二孀婦併三幼

子負遺骸歸新都葬之城西春即公大父畱耕公也性穎敏日記數千言家舊藏周易一部朝夕研究日漸有得乃入縣學為諸生復姓楊氏成化元年乙酉舉於鄉十七年辛丑舉進士移疾歸養弘治元年以熊夫人命北上授行人司司正時王端毅公為太宰擬授之際顧謂少宰張莊簡公曰老成人任此官固宜八年陞湖廣提學僉事踰年乞歸畱耕公配葉氏子七人長廷和即公父少師石齋次廷平號龍山戊午舉人終養不仕廷儀號瑞虹己未進士兵部左侍郎廷簡早卒廷宣號龍崖辛酉舉人獸擅古學為李文正公所稱嘗著連雲棧賦載蜀志皆葉夫人出廷歷以石齋考滿廕國子生廷中縣學弟子側室王氏出石齋公生於天順己卯甫四歲知聲律日記書數卷年十三舉於鄉二十舉進士由翰林庶吉士歷官少師兼太子太師首相兩朝有除難定策之功焉子四長即升

菴公少師元配一品夫人眉山黃公明善之女所
出次惇號敘菴癸未進士兵部職方主事恒號貞
菴承廡中書舍人陞大理右寺副忱號孚菴丙子
舉人皆太孺人蔣氏出若龍山公之子癸酉舉人
悅縣學生悌瑞虹公之子丙戌進士恂姚安知府
慥廬溪知縣性龍崖公之子荊州長史悅縣學生
惟則公之從弟也先是石齋與黃夫人以藉嗣為
憂嘗禱於神後神語曰當以聰明奇慧子畀君又
夢送五代忠臣夏魯奇至曰武臣也復以中庸十
八章輔之弘治元年戊申十一月初六日生公於
京師之考順術術岐嶷穎達十歲母夫人教之句
讀併授以唐絕句輒成調又以筆管印紙作圈令
公書字於中曰吾雖不知書然即此則楷正自可
觀矣公奮志誦讀不出外戶戊午年十一作近體
詩有一盞孤燈照玉堂之句石齋公曰句佳矣但
恨太孤寂耳不悅已未果罹母黃夫人憂極其悲

號廢食骨立未幾祖母葉太夫人訃聞隨石齋公
回蜀守制畱耕公授以易兩旬而洽不遺一字擬
作古戰場文有青樓斷紅粉之魂白日照翠苔之
骨數語瑞虹公極稱賞復命擬過秦論畱耕公奇
之曰吾家賈誼也一日石齋公與瑞虹龍崖二公
觀畫問曰景之美者人曰似畫畫之佳者人曰似
真孰為正公舉元微之詩以對龍崖曰詩亦未見
佳汝可更作公輒呈稿云會心山水真如畫名手
丹青畫亦真夢覺難分列禦寇影形相贈晉詩人
二公曰只此四句大勝前人矣時公年一十二辛
酉石齋公服闋公亦入京師有過渭城送別詩及
霜葉賦詠馬嵬坡詩云鳳輦匆匆下九天馬嵬西
去路三千漁陽鼙鼓烟塵裏蜀棧鈴聲夜雨邊方
上遊魂招不返詞人長恨曲空傳蛾眉尚有高丘
在戰骨潼關更可憐師福建鄉進士雪溪魏先生
浚習舉子業偶作黃葉詩李文正公見之曰此非

尋常子所能吾小友也乃進之門下命擬出師表
及傳奕請沙汰僧尼表文正覽之謂不減唐宋詞
人弘治乙丑侍石齋公於禮闈時崔公銑試卷在
分考劉武臣簾下疑其刻深未錄公見之愛其奇
雋以呈石齋公遂擢詩經魁崔知而以小座主稱
焉竟為生平知己時公年一十八正德丙寅與同
鄉士馮嗣石天柱夏邦謨劉景宇程啓克為麗澤
會即墨藍田永昌張含結社倡和丁卯歸應四川
鄉試督學南峯劉公面試而奇之曰吾不能如歐
陽公乃得子如蘇軾是秋果擢易魁九月安人王
氏來嬪清素僅如田家禮十一月上禮部戊辰春
試主考王公鑒梁公儲得公文已置首選卷偶失
燭遂下第有空吟故國三千里悔讀南華第二篇
之句入國學祭酒周公王類試之曰天下士也已
已歷事禮部周旋朝夕不倦尚書劉公宇一日見
公問曰子為誰公對曰楊慎劉曰本部天下人豈

必一大臣子弟耶乃稱嘆不置卒未禮部費公宏
知貢舉入總文衡則靳公貴擢公第二殿試則及
第第一制策援史融經數陳弘劉讀卷官李公東
陽劉公忠楊公一清相與稱曰海涵地負大放厥
辭共慶朝廷得人授翰林修撰公時年二十四癸
酉丁繼母喻夫人憂居家讀禮聘儀一無所受學
憲劉公鄮稱之曰禮不忘於口誦義每絕乎幣交
明年藍鄮諸寇作亂公在邑城中日夕戒嚴有賊
數百詐稱官軍以刼門者公令守垣堞者詰之散
去乙亥服闋冬十二月北上舟至嘉定黃閣扁幾
危而得濟遂與布政伍公符隣舟倡和下江陵丙
子入翰林為經筵展書官及校文獻通考同館則
鄮公守益王公思尹公襄劉公泉孫公紹祖張公
潮也丁丑為殿試掌卷官得舒公芬策以呈閣老
梁公儲不置鼎魁公力爭乃得首第時武皇遊幸
宣大榆林諸邊返而復往公疏切諫不報乃以養

疾乞歸明年王安人卒己卯繼室得遂寧黃簡肅
公珂女時江西寧藩之變值石齋公當國公經廣
漢詩曰遊子戀所生不獲常懷安大哉宇宙內吾
道何盤桓庚辰九月公北上仍舊官辛巳四月世
宗即位五月公為殿試受卷官八月開經筵公首
作講官進尚書金作贖刑之章言聖人贖刑之制
用於小過者冀民自新之意若大姦元惡無可贖
之理時大閣張銳于經等皆犯先朝事罪當死以
進金銀得免故及之壬午二月命公代祀江濱及
蜀藩諸陵寢著江祀記與給事熊公浹御史簡公
霄遊浣花溪載酒賦詩有烟霞誰作主魚鳥自相
親斗酒千金會扁舟兩玉人之句十二月北上復
命癸未纂修武廟實錄公練習朝典事必直書總
裁蔣公冕費公宏曰官階雖未及實堪副總裁者
乃盡以草錄付校時六年考滿吏部侍郎羅公欽
順考公語曰文章克稱乎科名慎修允協乎名字

甲申七月兩上議大禮疏嗣復跪門哭諫中元日
下獄十七日廷杖之二十七日復杖之斃而復甦
謫戍雲南永昌衛時同事死者配者黜者左遷者
一百八人挽舟由潞河而南值先年被革挾怨諸
人募惡少隨以伺害公知而備之至臨清始散去
時公年三十七乙酉正月至雲南病馳萬里羸憊
特甚栖栖旅中方就醫藥而巡撫台州黃公衷促
且甚公力疾冒險抵永昌幾不起巡按郭公楠清
戎江公良材極為存護卜館雲峯居之且上疏乞
宥議禮諸臣而郭亦被詔下獄為民丙戌九月聞
石齋公寢疾疋馬間道十九日至家石齋公悅而
疾愈七月攜家就戍所十一月尋甸府土舍安銓
變起十二月武定土舍鳳朝交亦起攻掠城堡為
患孔棘公嘆曰此吾效國之日也乃戎服率旅僮
及步騎百餘往援木蜜所守禦入城與副使張我
謀固守明日賊來攻城寧州土舍陸紹先率兵戰

城下公促城中兵鼓譟開門出戰以助外兵賊散
去公復歸會城戊子春疫殍大作乃徙居洱海城
疫息仍居雲峯尚書伍公文定黔國沐公紹勲鎮
守太監杜唐同來問疾時公一足病有半人嘲鑿
齒一足笑虞夔之句己丑八月寓趙州聞石齋公
訃奔告巡撫歐陽公子重疏上得歸裏事十一月
還滇壬辰正月布政高公公韶聘修雲南通志館
於滇之武侯祠時卿大夫有欲冒嗣潯川侯傳友
德以覲世爵者公不可乃乘張羅峯復相流言欲
中害公遂去有中宵風雨太多情畱住行人不放
行借問小西門外柳為誰相送為誰迎之句癸巳
西遊大理諸處會禹山張公含於霽虹橋刻詩崖
崕以志別甲午所迷州僉事王公廷表迎往館之
經臨安納少室新喻人周氏乙未六月子同仁生
丙申至喜州訪給事楊弘山十雲復寓點蒼山感
通寺之寫韻樓丁酉與御史李中漢元陽遊石寶

山七月還戍所戍戎奉戎檄歸蜀便道獲拜阡梓
事畢還滇己亥十一月再領戎役於重慶道庚子
役事竣至遂寧七月歸新都八月巡撫東阜劉公
大謨聘公及玉壘王公元正方洲楊公各纂修蜀
志辛丑還滇至東瀘疾作巡撫龍山戴公金畱之
返成都與梓谷黃公華珥江劉公大昌遊青城丹
景雲臺諸山壬寅七月還戍所八月納少室北京
人曹氏癸卯十二月子寧仁生公大喜時當道與
黔國沐公交遊士夫俱詩章宴賀有天上麒麟輝
蜀水海中龍馬過滇池之句是年公復領戎役於
蜀甲辰至瀘州與少岷曹公璵遊九十九峯山四
月還戍所乙巳二月徙居大理與門生董難尋罷
谷山經喜驗會弘山諸公倡和九月還戍所丙午
丁未居滇之高峽有十二景日與士大夫交遊二
月公屬紹芳隸漢王褒移金馬碧鷄文於羅漢寺
之崖凡招提佳勝會意處便操觚畱題冬十月公

復適臨安訪臬憲樊公景麟暨桐岡葉公遊諸巖
洞勝景戊申春至晉寧與侍御池南唐公錡遊海
蜜蟠龍生佛諸山陀已酉居高曉夏秋每與滇之
卿大夫葉兩湖胡在軒游初武廟閱文獻通考天
文星名有注張命內閣取祕書通考又作汪張中
使下問欽天監及翰館中皆莫知為何星也公曰
注張柳星也歷引周禮史記漢書以復又湖廣土
官水盡源通塔平長官司進貢同官疑為三地名
於長官司上添一三字公曰此六字地名也取朝
中官制證之嘉靖初給事中張紳上言時政論學
術不止一條有喬宇菟瑣之語上問之內閣公適
在館中即取荀子非十二子篇以復敬所蔣公喜
曰用修之博何減古之蘇頌乎其該洽精辨類如
此乃若論王導之賊晉室辨太王之非剪商魯之
重祭不始於成王周公春秋五伯深斥乎楚宋秦
繆引墨子及修文御覽以辨范蠡無載西施之事

引黃東發蘇東坡之言及李漢韓文序以辨文公
與大顛書之偽駁歐陽氏非非堂之說辨陳白沙
六經皆虛之語斥戴石屏之無行傳唐貴梅之死
節此又證據古今闡揚幽隱謂其有功世教也非
乎至若陶情乎豔辭寄意於聲伎落魄不羈又公
所以用晦行權匪恒情所易測者也昔重慶守劉
公繪貽公廷祿偕紹芳數遊昆明池有池賞詩社
集庚戌四月海口疏雲南臺司顧著溪諸公請公
記其事於石壬子二月時在逸武升得委祭龍海
口歸肆狂惑復丁夫六千督往駐瀘剝衆利州人
苦之有言於公者公嘆曰海已涸矣田已出矣民
已疲矣致書巡按趙公炳然罷之三月劉蓉峯明
刑持先廷尉執齋王公詩文集請公批選於太華
寺癸丑公復領戎役於蜀僑寓瀘州丁巳六月長
子同仁卒無嗣八月歸新都叙菴弟辛公痛悼倍
於尋常其誄辭有曰我生與弟先後之年呱呱而

泣形分氣連夏炎合簞冬寒並瓊母攜父抱悵溼
就乾八歲就博雙筆一研嬉戲皆止出入隨肩飲
啖讓果跬步共磚又曰七喪將躋我歸自滇兄酬
弟勸翕樂罔慙觴我於庭羣從孚掌劇談飛屑倡
和珠璣笑語並斷頃刻弗延豈宴席化為几筵
遽爾凋喪門祚中顛幼弱一人何忍余捐余生則
先第亡則前前後後存亡誰質諸天其友愛至情見
於辭者如此至若保誨遺孤紀綱家政既乃心力
從子有仁以髫年失怙而幸免於顛覆者皆公惠
之及也戊午子寧仁娶瀘州滕恩官女為室公僑
寓江陽者十數年交遊日衆與曾岷野章后齋諸
公友善己未春還戎所六月遘疾感懷詩曰七十
餘生已白頭明明律例許歸休歸休已作巴江叟
重到翻為滇海囚遷謫本非明主意網羅巧中細
人謀故園先隴癡兒女泉下傷心也淚流又訣李
張唐三公詩云魑魅禦客八千里義皇上人四十

年怨誹不學離騷侶正葩仍為風雅仙知我罪我
春秋筆今吾故吾逍遙篇中溪陽元半谷張池南

唐叟此意非公誰與傳卒於七月六日年七十有
二時巡撫雲南游公居敬命殯歸新都庚申冬附

葬石齋公墓側丁卯穆宗即位奉遺詔追贈光祿
寺少卿長子同仁先卒次子寧仁時寓廬州公卒

之年夫人黃至廬迎歸撫教則夫人任之也公孝
友性植穎敏過人家學相承益以該博凡宇宙名

物之廣經史百家之奧下至稗官小說之微醫卜
技能草木蟲魚之細靡不究心多識闡其理博其

趣而訂其訛謬焉正德間有寄書曰凡人情有所
寄則有所忘有所譏則有所棄寄之不深則忘之

不遠譏之不甚則棄之不篤忘之遠則我無所貪
棄之篤則人無所忌無所忌而後能安無所貪而

後能適足下所為蓋得其適與安也古人買田宅
擁聲伎皆豪傑蓋世之才然獨無抱尺寸者之見

也僕觀足下自蒙難以來嘔心匠意摹文續經延
搜百氏窮探古蹟鑿石辨剝泐碑搜出遺忘有僻
儒苦士白首蓬蒿日自纂索所不能盡而謂竭精
蕩神於逸欲聲色者能之乎斯言也可謂諒公之
深者矣公嘗語人曰資性不足恃日新德業當自
心力中來故好學窮理老而不倦又嘗自贊曰臨
利不敢先人見義不敢後身雖無補於事業求不
負乎君親遭逢太平以處安邊歌咏擊壤以終餘
生天之顧畀厚矣篤矣吾之涯分止矣足矣蓋因
而亨沖而盈寵為辱平為福者耶此公自狀實錄
至其生平著述四百餘種散
逸頗多學者恨未睹其全也

舊志器物譜

夾江弱瀕鎮玉印

明弘治初士民耕田犁出一印
如玉上刻云衛生藥寶為郡醫

所獲又一藥臼碎之欲鑄農器遇火即飛散矣識者惜之

旌陽古鼎

昆明傳順孫令德陽時治廨後蔬圃鋤下地應有聲若震金石掘丈餘許得古

鼎高三尺五寸圓四尺五寸厚二寸兩耳高五寸薄三寸五分孔圓一寸扁穿耳方圓一寸鼎蓋厚寸五分龍虎雕畫細如毛髮其質非鐵非石體作丹砂駁文發之黃金滿鼎可百餘斤順孫獲鼎以還昆明身後其子孫侈費蕩盡立錐地不能存蓋許真君作丹代民租以其餘瘞地中俟異日不能租者而人不知迄今千餘年神物或輕用若有攝而去矣

靈巖石鼓

眉州大江東北岸近靈巖寺下江沙中得巨石鼓一高三尺圍六尺許形製殆

類岐鼓狀但無紀畫可考豈蜀石善泐為罌溝所薄蝕盡乎僧因舉置廡下寶重之

邵氏爐

宋邵伯溫仲子博隨父入蜀其祖康節嘗語之曰世亂蜀可居宣和末伯溫載家人

仕蜀家於嘉州始免難博隱於犍為太定山遺草書十字文石刻為寺僧所毀惟方丈古銅香爐存

異文瑞石

宋太平興國四年嘉州夾江民王諸得江石二皆黝質丹文隱起成字一曰君

王萬歲一曰趙二十一帝

鳳頭石

夾江縣有鳳頭石上有文若鳳頭狀提學王公懋倫識於江臯命縣令陸綸寘於學

銅馬

宋時郫縣村民鑿古墓得一銅馬高三尺許製作精妙簡池守景李淵取以歸中宵風

雨輒聞嘶聲怪之不敢畱移送佛寺紹興丙子王灼以事至成都黃伯淵見索灼為作銅馬歌云君不見武皇逸志凌九垓追風躡電思龍媒魯班門外立銅馬天廡萬匹皆塵埃又不見伏波將軍破

交賊歸來殿前獻馬草據鞍習氣殊未衰想見老子真雙鑠兩京飄覆知幾秋只有山河共客愁孤烟落日蠶叢國出此神物於荒丘千年黃壤誰作主猶把歸心泣風雨但恐一朝去無踪有似豐城雙寶劍化

內江古物

內江縣化龍山石崩裂得古鏡二寶劍一印篆一有石刻云有宋之始化龍為

記日月相均永遠不墜鏡為當事者持去印劍貯長生觀中今皆不知所在又三堆山居人掘得銅牌一面上有字云塵世不我畱身寄白雲浮若問真遊處三山與十洲

綦江古物

綦江縣白雲觀掘地得白雲石硯一古鏡一鑄有湖州青銅照子六字古錢一

曰淳佑通寶又古劍山掘得古劍一

諸葛鼓

萬歷元年四川巡撫曾省吾蕩平九絲城都蠻俘獲諸葛銅鼓九十三面擇其有聲

者六十四面分天地人三號以獻蠻中以為寶器有剝蝕聲響者為上上易牛千頭次者七八百頭遮有等差藏至二三面者即得雄視一方所鑄皆奇文異狀互相錯蟠僅可辨者雕螭刻鷺間綴蝦蟇其數皆四疑武侯所製以鎮蠻者

鼙器

同時又得銅鐵鍋二口皆阿大王所蓄製更奇異識者曰此非鍋乃鼎類也其名曰鼙詩

云溉之釜鼙其制大上小下若甑鑄無足兩耳峙如山形蠻中尤為至寶即諸蠻多不得見其重又

不啻
銅鼓

諸葛圖譜

漢南夷輕為禍變諸葛亮乃為之作圖譜先畫天地日月君長城府次畫神龍

龍生彝牛馬羊後畫部主吏乘馬幡蓋巡行安邨
又畫牽牛負酒賣金寶詣之象以賜夷夷甚重
之許致生口又與瑞錦鐵券每刺
史校尉至賈以呈詣動亦如之

丁大夫

明朝御史大夫丁玉以平羌將軍經略西
番鑄銀為錠與之要約散給諸羌得之者

寶之如神物上有誓詞輕重
不等番中號之為丁大夫

大滾玉印

宋宣和中夔人龍澄嘗於大滾水中獲
玉印文非世間篆籀澄恍見天神立於

傍曰此印為上帝所寶忽
不見澄乃奉印投原處

東溪石

捷為治東二十里土人掘地得石上題東
溪之湄孕秀懷奇偉哉丈人文章之師寶

而藏之赫
然有輝

玄武石

中江玄武山下淵中
產石成龜蛇之形

嘉州寶鏡

宋漁人王甲於江中網得古銅鏡一枚
徑圓八寸許有瑯瑤款式甲不能識也

持歸生計日豐不假經營而錢財自至間謀獻之
白水寺僧以贗者易之後復為其徒竊以他往
值神人持戟長身甚武叱曰還我寶鏡僧疾走百
步有虎扼其前懼而擲之以竄遂不知所在詳見
洪邁嘉州
江心鏡記

漢磬

漢成帝綏和元年犍為郡於水濱得古磬一
十六枚劉向因上言宜立碑雍陳禮樂以風

化於天下得磬處在玉津縣
今之犍為壩也距州十里

丹岳

漢嘉郡治之西偏望雲樓東有石穴天將雨
輒出雲氣發之則石室屹立室之前地中獲

瓦缶形製甚古貯丹砂雲母奇石或爛然類黃金意其金丹之餘也悉斂而積藏輸之府庫

金氏諸錢

綿州大叅贈中丞金鬱為寺丞時治第於家瓦礫中得錢四其文曰早登科第

後知思南府脩廡舍得錢一其文曰子孫昌盛家孫白建新宅復得錢一其文曰加官進祿考之古錢無如此者父子祖孫相繼榮顯亦非偶矣

晉磚

灌縣西鉢孟泉因墾地得一磚上有晉太康年號

唐鐘

雅州龍興寺有唐開元十七年鐘上隱起一銀錠其迹宛然

唐礎

新都縣有唐僖宗幸蜀時所遺行殿柱礎

唐幢

成都石犀寺後有土阜嘉靖間寺僧掘得石幢一合頂趺高七尺許形削六方徑圍三尺

上刻尊勝護諸童子等咒為唐太和中馬季武書筆法遒勁蓋奇物也

元鐘

江安縣西林寺有元時所鑄鐵鐘音聲洪遠震聞數里

雅安奇石

雅州山門寺殿前有石一株高近二丈周五丈形如盛開花朵色青碧如鴿羽號太湖石縣令許長源愛其瑰

特雨餘翠碧鮮潤謂宛如天竺羅浮飛來之異因名飛來又雲峯寺殿前亦有石高丈餘周四丈奇峭若峯

米石

忠州石竇山一石突高員三四丈餘根狹小傍有一孔如孟通明其頂相傳昔有米出其

中日可食一人僧因利焉後以冗穢米遂絕已縣亦有金田寺宋時米自山孔中流出以供寺僧今無矣

甌草引藤

忠州東南十里曰甌毛山地多產草如甌八十五里曰引藤山其山多出引藤

大如指中空可吸酒白樂天詩閒拈蕉葉題詩句悶取藤枝引酒嘗

松屏石

涪州松屏山翠聳雲霄其山上產石有文如松形可製為屏每雨餘青連江練色映

城州

青蠟石

已縣岷江水邊細密之石名青蠟石可作茶碾

寶珠

大足寶珠溪在治南四十里唐貞觀時漁人郭福者夜捕魚見水際有光即之有蚌如斗

剖之得珠徑寸獻之太宗賜以積善井碑碣存

石龜

榮昌東有小石溪溪中有石坑如甕石底有天成石龜安居山亦有鑿石得龜者

響石

武隆治東闊灘叢石中有響石舊傳高僧過此談經而鼓之鏗鏗然今擊之猶有聲

山巖木櫃

彭水縣麻油灘上懸崖壁立人攀緣不能到其巖窰之處嵌空各有木櫃藏置

其中莫考從來今改名萬年倉又黔江櫃子巖亦有此異其高數十丈上有木櫃至今不朽因以為

名焉

諸葛石鼓

夔州府江岸與八陣圖相對有石鼓世傳武侯教戰之鼓

柏柱

白帝城西有木如柱大十圍高三丈世傳為公孫子陽樓柱斫之出血枯而不朽

誓水柱

石泉縣河岸有石高一丈圍五尺前人立以坊水名誓水柱

張三丰遺物

銅梁巴嶽山有真人張三丰所遺扇硯竹杖各一寺僧寶以為重

孫真人遺物

藥罐一銅質大可容數升藥白一鐵質有六足製甚朴古重二十餘斤在

峨眉山牛心寺又有金
錫杖為前人取去無存

玉版金鐘

銅梁十五里已嶽山永樂中有人鑿井
得玉版扣之其聲清越如磬獻華陽王

又寺有鐘赤色如金扣之聲聞
百里蓋先代物也今皆無存

孔子篆碑

保寧府文廟中有宣聖篆碑二其一題
比干墓曰左林右泉峻岡前導萬世之

寧茲焉是寶其一題曰鳴
呼有吳延陵李子之墓

放光石

峨眉山放光岩下有石透白如水晶形如
馬牙置之日隙以手撫之即成五色雲氣

名曰放
光石

縣署奇石

永寧陳以莊知成都縣曰修葺衙宇於
土中得石一具約高三尺許廣倍之質

理奇崛狀嵌空可愛頂有竅全體貫通以水注之
周流噴溢如濺珠灑沫然陳甚奇之為文以紀移

置內江
王邱中

石芝

成都山人李綦得一石於板築之家高尺許
蟠頂垂足中圍如帶儼然瑞芝也名曰石芝

南城石缶

成都中和門右剏建火神廟掘地基得
磁盎容五六升形圓如瓜色綠如豆蓋

如荷葉不知為何
物也安置廟中

晉刻漏

嘉定州舊有銅壺滴漏相傳為郭景純守
嘉州日製規制奇絕後移置會省在今鐘

鼓樓上宋范成大
有銅壺閣落成詩

濂溪石

宋周濂溪判合州時嘗與人對奕有一老
人傍觀口吐涎香氣襲人公驚曰汝龍也

何故來此老人曰何以知之公曰吾聞龍涎極香汝口中所落者是也須臾大雨雷電老人化龍從溪而去公取方石二十四片鎮溪口今通曉橋是也

試劍石

昔漢天師轟雷燂電而斬妖魔擲筆試劍而弘正法於此石試劍一劈而中分作二

高有數十丈在青城山延慶觀北

碁盤石

灌縣靈巖山之極峯仙人嘗奕碁於此石有碁勢傍有年號乃天祐二年

朝天石

灌縣朝天寺正德末有遊僧開辟穢址得一石有詩前已剝落結句云天孫縱有聞

針線難繡西川百里圖筆法道勁可愛

中江碁石

唐田真人名大神字南陽來隱棲妙山觀中能驅絕蛇虺履水如平地嘗與二

道士奕撒基於江人取以獻蜀王旋失去後
又得於玉局洞前石盤內自是江中產基石

金堂石龍石足蹟

金堂縣華嚴寺後岩上有一石
龍長數丈身現二處鱗甲儼然

水如古柏根其下泉水甚清歲旱取湫有應又峽
岸有巨石足蹟長二尺許指掌宛然不鑿而成

廣元石文石符石筍

廣元縣有石崖二字乃石中
自然成文嘉靖中崩出一面

字隆江中一面字現石上歲久不磨其痕如玉又
江中有天符石大如棹上有文如符相傳為張道
陵所書人佩之能祛邪孕生男三岔溝有石
筍十餘根其直如柱皆百餘尺真奇觀也

靈女擣衣碓

綿州靈山治東五里舊巴西縣東絕
頂有石明瑩相傳神女擣衣於此謂

靈女擣
衣碓

石磬

彰明縣治南二十里與大匡山接李膺紀云有石方丈餘如磬擊之聲聞數里

石松

永川縣六十里古有松紋節理蒼皺散卧野中世所為斷石上有松紋節理蒼皺散卧野中世所

見罕

仙岩奇石

資縣治南四十里壁立萬仞石室天造凝結人形或住或坐如舞如憑大類飛

仙行

天柱

資縣旗鼓寺前岡特起一石約高五丈餘下清而勁上方而稜非笋非牙題曰天柱

蘇硯

嘉烟尖山坡東坡曾稽古於此成化中有掘地得其遺硯者為督學王穀取去

鷄石

龍安府石白壩官道左黑石白文其狀如鷄首尾冠目儼然俱備

鷹石

龍安平夷鋪有奇石狀如鷹蒼羽
白項黑嘴行者望之以為奇觀

劍石

保寧真武廟小池中一石
長丈餘挺然斜倚名石劍

瓊鐘石

越嵩衛西北六十里山半有洞寬厥可容
數千人崖半懸石一片長五尺濶四尺厚

四寸擊之有聲名曰瓊鐘明初龜壺道士修鍊於
此有詩畱石壁云北倚峨眉西閬峯雲間岐路去
皆通冰消玉浪鳴幽谷夜靜瓊鐘響太空嵐擁翠
峯秋聳碧霞侵丹室曉舒紅九篇真訣無人得誰
識金懸
素宮

繡衣石仙女鏡

開縣北二里盛山之麓有大石方
圓二丈上有生成錦繡紋故以繡

衣名之南五里山岩之畔有石方圓五丈許光
彩耀目凡遇陰雨其光遠映照鑑則絲髮無隱

麻山洞石

德陽縣麻姑山有石洞六二開一閉在江南三閉在江北綿水流其中洞深數

丈石牀四石人五石馬三騎者二

掌石

內江蓬瀛山下雙石屹立狀如合掌峻整巨秀為一方之奇觀趙文肅曾為之賦

笏石

內江治東江上有石尖挺如笏名曰笏石清流時浴而不汙夏漲奔衝不變蓋石之秀者

金井海螺石

瀘州九姓司地名金井盤石似螺往來人憩息吹之聲響洪越人不厭聞

舊志動植譜

紫柏

灌口西有古樹圍八九丈上有寄生木亦大數圍傳言秦物也土人名曰紫柏

金果

成都府江濱廟前有樹六株其樹高五六丈圍約三四尋挺直如矢無他柯幹頂上纔

生枝葉皮如龍鱗葉如鳳尾實如棗而加大每歲仲冬有司具牲饌祭畢然後採摘迎入公廡差點醫工以刀逐個剝去青皮石灰湯焯過令熬冷蜜浸五七日漉起控乾再換熟蜜如此三四次即入瓶缶封貯進獻川中人謂之金果番中名為若魯麻蒙蓋鳳尾蕉也

蜀柳

齊劉俊之為益州刺史獻蜀柳數株條甚長狀若絲縷武帝植於太昌靈和殿前常觀嘆

曰此楊柳風流可愛似張緒少年時其見賞如此

犀浦古楠

成都犀浦國寧觀有古楠四皆千歲木也枝擾雲漢聲挾風雨根入地不知幾

百尺而陰之所庇車且百兩正晝日不穿漏夏五六月暑氣不至凜如九秋成都固多壽木然莫與

此者

蜀荔枝

荔枝叙馬瀘合俱出嘉定富順亦有之叙馬瀘為上涪合為次嘉定今生一二株

舊屬蜀藩華陽國志載漢宣帝時荔枝開日二千石張具其下邀賓賞之一騎紅塵妃子笑蓋從棧道入關耳涪舊有妃子園類最肥大馬馳七日夜即抵長安其速如此所謂無人知是荔枝來也重慶榮昌諸處亦間有龍眼白居易為木蓮荔枝圖各紀其狀曰荔枝生已峽間樹形團團如帷蓋葉如冬青華如橘春榮實如丹夏熟朶如蒲桃枝如枇杷殼如紅繒膜如紫綃瓤肉潔白如冰雪漿液甘酸如醴如酪若離本枝一日而色變二日而香變三日而味變四五日外色香味盡去矣

萊公柏

冠萊公知巴東縣嘗手植雙柏於縣庭後巴人思之謂之萊公柏

巴橘

巴邛人家有橘園霜後盡收斂有大橘如三斗盎巴人異之剖開每橘有二隻鬚眉皤然

肌體紅明皆相對象戲談笑自若一叟曰橘中之樂不減商山但不得深根固蒂為人所摘耳

古桂

彭縣玄妙觀中有桂二株對植於仙臺左右雙幹交枝老根蟠露不知幾百年矣四時清

陰覆地十餘丈秋日花開黃金萬斛香飄十里殊為奇絕

異栗

青城山出天師栗似栗而小獨房者為異人食可治風掌相傳張道陵手植七十株在上

清宮

玉真花

青城山出玉真花差小者號寶仙淺者為醉太平白為玉真古稱為石端聖花

凌雲蕙

凌雲山產蕙葉長而圓花英盛極香馥他蕙莫及俗云雅州蘭鳥尤蕙

異楠

嘉定州兌說峯下有大楠三株畱雲蔽午終歲黛色諸峯蔥蒨楠所助也匡氏謂之背陰

斲之無香不
中採用故存

異柏

嘉定清音亭前有異柏四株霜皮黛色其葉一則瑣細如剪一則扁平如片一則垂絲如

柳一則蜩刺如
毛異於他柏

松喬

嘉定洗墨池有松四枝撐出如長蛟挐空柔條曲糾北折而南既垂且仰鬱然偃蓋大如

車輪爾雅云小枝上繚為
喬扶疎曲翹是謂松喬

壁竇草

峨眉山有壁竇草光如瑩火或隱或見雖赤日不掩

塔松

峨眉山有松狀如杉而葉圓細偃蹇如浮圖

莎蘿

峨眉山莎蘿坪有花木一種每萼數枝多者十餘枝並開其蒂大可尺圍色有大紅有粉

紅有白燦爛如錦散滿谷嶼中山僧呼為莎羅花
十餘里皆有之諸名山所無瓦屋山亦出莎羅花
五色如爛錦照映山
谷移之他處則槁

靈壽木

產夔州府
龍洞溪上

江安二松

江安三清觀有二松高十數
丈每晨昏烟雲鬱鎖不散

邛竹

出邛州之邛崃山即古臨邛地也漢張騫奉
使西域得高節竹還而植此今人取以為杖

鶴膝者佳又叙州亦出此竹雅州
復有一種名羅漢竹皆為杖之具

蒟醬

見相如揚雄左思諸賦中註云綠木而生其
子如桑椹蓋焚道通越舊之地出蒟醬人取

以為醬焚地即今叙州也或云今之鷄鬃油及滇
中窰葉皆相彷彿晉灼註拘音矩徐廣注拘亦作

蒟音
窶

蒙頂茶

名山縣蒙山上清峯甘露井側產茶葉厚而圓色紫赤味略苦春末夏初始發苔蘚

庇之陰雲覆焉相傳甘露大師自嶺表攜靈茗播五頂舊志稱頂茶受陽氣全故芬香唐李德裕入

蜀得蒙餅以沃於湯餅上移時盡化以驗其真傳稱雅州蒙山上有露芽故蔡襄有歌曰露芽錯落

一番新白樂天詩茶中故舊是蒙山吳中復謝人惠茶詩吾聞蒙山之嶺多秀山惡草不生生淑茗

皆謂此
茶也

雷鳴茶

蒙山有僧病冷且久遇老父曰仙家有雷鳴茶俟雷發聲乃茁可併手於中頂採摘

服未竟病瘥精健至八十餘入青城山不知所之今四頂茶園不廢惟中頂草木繁重人跡希到

太湖茶

瓦屋山太湖寺出茶味清冽甚佳詩人詠之曰品高李白仙人掌香引盧仝玉腋風

虞美人草

益州草木記雅州名山縣出虞美人草人或歌曲應拍而舞酉陽雜俎云舞草

出雅或云如鷄冠花葉兩兩相對或云中出一莖旁兩葉相對似決明

古榆

眉山有古榆一株在蘇祠門外左隅相傳老泉手植至今枝葉榮秀

古荊

眉州治文廟左右有紫荊各一蒼古花甚盛相傳宋元時植

文木

宋太祖乾德五年合州漢初縣上青樛木中有文曰大連宋又瑞應山於景德中出異木

生文成天下太平字魏了翁有記

桃異

榮昌峯腦山崖畔有巨石縫中突出桃一株高丈餘葉幹與凡桃異花實不常宣德中桃

實各圍尺許每遇結實邑必有登第者宋
人有題詠邑令張東義名之曰桃香仙嶺

蓮異

榮昌有瑞蓮寺宋進士姚東之讀書處山高
十數尋石池水泉不竭中產蓮一種從石縫

中出左紅右白花不實根不藕
開亦不常紅兆科第白兆豐年

竹異

黔江縣斑竹山上有仙池池邊每
歲生斑竹二株及尾則環連焉

桂異

涪州南長灘里內巖下有古桂樹花不常開
其年有士登科則花石上有桂巖二大字

稻異

鄧都稻名重思其米如石槌子粒稍大味如
菱杜瓊作重思賦曰日霏春暮翠矣重思雲

氣交被嘉
穀應時

木蓮

銅梁縣巴嶽山有木蓮樹高五六丈葉如梗
柗花如菡萏出山則不植尚書王世貞異物

志特紀之宋周敦頤觀巴嶽木蓮詩有枝
懸縞帶垂金彈瓣落蒼苔墜玉盆之句

著草

漢平鄉縣費貽宅有著草生其上有
雲氣覆之明成化間又生於南安鄉

金樹

保寧物產中有金樹上有鏤
刻文可觀人多取以薦香

不灰木

會川衛產木火煨不化土人取以為燈心
既燼復故名不灰木或曰火浣布乃此物

織成

雪蛆

產於岷峩深澗中積雪春夏不消而成者其
形如蛸但無刺肥白長五六寸腹中有水身

能伸縮取而食之須
在旦夕否則化矣

香猪土犬

建昌松潘俱出香猪小而肥肉頗香土
犬亦小而肥美羣遊稻田一犬登樹而

望如有捕者則先鳴
吠令衆犬奔逸去

白蟹

嘉定州凌雲寺白蟹
間出祝融峯泉中

黑頭魚

黑頭魚在大佛沱春初
出上止九泓下止烏尤

鯢

雅州有魚曰鯢即鯢魚有四足大首長尾聲如
嬰兒善緣木天旱輒含水上山以草覆身張口

露水鳥來飲水因吸
食之性有毒出溪江

異鳥

漢孝宣帝黃龍中越嵩之南獻背明鳥形如
鶴止不向明巢常對北多肉少毛聲音百變

間鐘磬笙竽聲則奮翅
搖頭時人以為吉祥

長鳴鷄

孝成帝時越嵩獻長鳴鷄即下漏驗之
刻無差長鳴一食頃不絕長距善鬪

猪鯉

青神縣宋初百年前有牝猪伏於水次化為二鯉在泉中而莫有見者蘇子瞻偶見之以為

告其友王愿愿以為誕子瞻因禱於泉二鯉復出

鄧都白鹿

鄧都白鹿山與平都對峙昔時林木茂密相傳有白鹿藏此每令有佳客至則

先夜輒鳴邑令往往以此候驗之

水驢

綦江縣明月沱在治南觀音堂百步外中有水驢見則致旱

犍牛

蜀山中有大牛重數千斤名為犍牛晉大興元年此牛出上庸郡人弩射殺得三十八擔

肉即爾雅所謂魏也

猛豹

猛豹似熊而小毛淺有光澤能食蛇食銅鐵出蜀中

狎狎

峽山在漢嘉嚴道縣南江水所自出也山有九折坂出狎狎似熊而黑白駿亦食銅鐵也

酋耳

周永昌中涪州多虎有獸似虎而絕大逐一虎噬殺之錄奏檢瑞應圖酋耳不食生物遇

虎則殺

峽猿

峽中猿鳴清山谷其響泠泠不絕行者歌之曰巴東三峽猿鳴悲猿鳴三聲淚沾衣

龍毛

益州雒縣寺塔為龍所護側有三池莫知深淺三龍居之人莫敢臨視貞觀十三年三龍

大鬬雷霆震擊水火交飛久之乃靜人皆拾得龍毛鬚一撮長三尺許黃赤可愛

湔水魚

湔水在威州治內玉壘山下石峽出泉滴注洞中碧澄瑩澈有魚長七八寸者隊游

其中不增不減相傳為神魚人不敢食上有古木蟠根蒼翠蔚然雖溽暑如秋

龍馬

馬湖府三百里外有湖四圍皆峻崖長二十里廣七里中有堆如螺髻去大江二里其水

與江流同消長日夕作潮昔有龍馬見於湖郡因以名

建昌異鳥

建昌衛產異鳥有二首名曰雙頭鳥

寧番異獸

寧番衛產異獸名曰雪裏眠蓋狐貉之類也其皮可以禦寒

金蟹

凌雲寺金蟹池泉穴出蟹大如金錢有土人讀書其旁夜半汲水見一蟹如孟大急取而

置之器中覆而壓之明日視之已失所在矣

伏龍觀魚

灌縣離堆山即李太守所鑿以導江處上有伏龍觀下有深潭傳聞二郎鎮孽

龍於其中霜降水落或時見其鎖云每有羣魚游深潭面僅露背鬣其大如牛投以石魚亦不驚人

亦不敢取之
蓋異物也

錦江異龜

成都大江有龜潛深淵父老相傳其形甚大人不常見見則少有沉溺之憂其

行有定處上止青羊橋下止濯錦橋或云張儀城蜀時有龜出江中循其跡而築之名曰少城龜之

異蓋自古

而然矣

麟兒獻瑞

瀘州九姓司南澗繞流時當盛世漁人每見麒麟隨波隱見故名

寶珠金鵝

瀘州九姓司環堵皆山丘垤中出一井水流異味土人常見金鵝朝去暮宿建

立寶珠
庵於上

四川通志卷四十六